


明史藁

志自四十六
至五十一

十九

375
D2



| | | | |
|------|---|---|---|
| 漢書門類 | | | |
| 二 | 三 | 一 | 類 |
| 九 | 〇 | 一 | 號 |
| 八 | 〇 | 一 | 冊 |

| | | | |
|------|---|---|---|
| 內閣文庫 | | | |
| 二 | 三 | 一 | 漢 |
| 八 | 〇 | 一 | 書 |
| 二 | 〇 | 一 | 冊 |
| 二 | 〇 | 一 | 架 |

| | | | |
|------|---------|------|--|
| 內閣文庫 | | | |
| 番號 | 漢 | 2231 | |
| 冊數 | 80(19) | | |
| 函號 | 281 | 40 | |



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak





一、光緒二十六年...
 二、...
 三、...
 四、...
 五、...
 六、...
 七、...
 八、...
 九、...
 十、...

卷之四十八

明史彙

志第四十六



光祿大夫

經筵講官明史總裁戶部尚書加七級臣王鴻緒奉

敕編撰

儀衛

周官隸僕掌蹕宮中之事。漢朝會則衛官陳車騎張旗幟。唐沿隋制置衛尉卿掌儀仗帳幙之事。宋衛尉領左右金吾街司左右金吾仗司六軍儀仗司。主清道徼巡排列奉引儀仗。元置拱衛司領控鶴戶以供其事。歷代制度雖有沿革異同。總以謹出入之防。嚴尊卑之分。慎重則尊嚴。尊嚴則整肅。是故文謂之儀。武謂之衛。天子出車駕次第謂之鹵簿。而唐制四品以上皆給鹵簿。則君臣皆得通稱也。明初詔禮官鹵簿



7303

彌文務從省節以示尚質去奢之意凡正至聖節朝會及冊拜接見蕃臣儀鸞司陳設儀仗而中宮東宮親王皆有儀仗之制後或隨時增飾要以洪武創制為準則焉茲撮集禮所載大凡以備考核其郡王及皇妃東宮妃以下儀仗載在會典者竝著於篇云

吳元年十二月辛酉中書左相國李善長率禮官以即位禮儀進是日清晨拱衛司陳設鹵簿列甲士於午門外之東西列旗仗於奉天門外之東西龍旗十二分左右用甲士十二人北斗旗一纛一居前豹尾一居後俱用甲士三人虎豹各二馴象六分左右左右布旗六十四門旗日旗月旗青龍白虎風雲雷雨江河淮濟旗天馬天祿白澤朱雀玄武等旗木

火土金水五星旗五嶽旗熊旗鸞旗及二十八宿旗各六行每旗用甲士五人一人執旗四人執弓弩設五輅於奉天門外玉輅居中左金輅次革輅右象輅次木輅俱竝列丹墀左右布黃麾仗黃蓋華蓋曲蓋紫方纛紅方纛雉扇朱團扇羽葆幢豹尾龍頭竿信旛傳教旛告止旛絳引旛戟擎戈擎儀鎧等各三行丹陛左右陳幢節響節金節燭籠青龍白虎幢班劍吾杖立瓜臥瓜儀刀鐙杖戟骨朶朱雀玄武幢等各三行殿門左右設圓蓋一金交椅金脚踏水盆水罐團黃扇紅扇皆校尉擎執洪武元年十月定元旦朝賀儀金吾衛於奉天門外分設旗幟宿衛於午門外分設兵仗衛尉寺於奉天殿門及丹陛丹墀設黃麾仗內使監擎執於殿上凡遇冬

至聖節。冊拜親王。及蕃使來朝。儀俱同。其宣詔赦降香。則惟設奉天殿門。及丹陛儀仗。殿上擎執云。其陳布次第。午門外刀盾戈叉。各置於東西。甲士用赤。奉天門外中道。金吾宿衛二衛。設龍旗十二。分左右。用青甲士十二人。北斗旗一。燾一。居前。豹尾一。居後。俱用黑甲士三人。虎豹各二。馴象六。分左右。左右布旗六十四。左前第一行。門旗二。每旗用紅甲士五人。內一人執旗。旗下四人執弓箭。第二行。月旗一。用白甲士五人。內一人執旗。旗下四人執弩。青龍旗一。用青甲士五人。內一人執旗。旗下四人執弩。第三行。風雲雷雨旗各一。每旗用黑甲士五人。內一人執旗。旗下四人執弓箭。天馬白澤朱雀旗各一。每旗用紅甲士五人。內一人執旗。旗下四人執弓

箭。第四行。水。火。土。金。水。五星旗各一。隨其方色。每旗用甲士五人。內一人執旗。旗下四人執弩。其甲木。青。火。紅。土。黃金。白水。黑。熊。旗。鸞。旗。各一。每旗用紅甲士五人。內一人執旗。旗下四人執弩。第五行。角。亢。氏。房。心。尾。箕。旗各一。每旗用青甲士五人。內一人執旗。旗下四人執弓箭。第六行。斗。牛。女。虛。危。室。壁。旗各一。每旗用青甲士五人。內一人執旗。旗下四人執弩。右前第一行。門旗二。每旗用紅甲士五人。內一人執旗。旗下四人執弓箭。第二行。日旗一。用紅甲士五人。內一人執旗。旗下四人執弩。白虎旗一。用白甲士五人。內一人執旗。旗下四人執弩。第三行。江河淮濟旗各一。隨其方色。每旗用甲士五人。內一人執旗。旗下四人執弓箭。其甲江。紅。河。白。淮。青。濟。黑。

天祿白澤立武旗各一。每旗用甲士五人。內一人執旗。旗下四人執弓箭。天祿白澤紅甲。玄武黑甲。第四行。東南中西北五嶽旗各一。隨其方色。每旗用甲士五人。內一人執旗。旗下四人執弩。其甲東嶽青。南嶽紅。中嶽黃。西嶽白。北嶽黑。熊旗麟旗各一。每旗用紅甲士五人。內一人執旗。旗下四人執弩。第五行。奎婁胃昂畢觜參旗各一。每旗用青甲士五人。內一人執旗。旗下四人執弓箭。第六行。井鬼柳星張翼軫旗各一。每旗用青甲士五人。內一人執旗。旗下四人執弩。奉天門外。拱衛司設五輅。玉輅居中。左金輅。次革輅。右象輅。次木輅。俱竝列。典牧所設乘馬於文武樓之南各三。東西相向。丹墀左右。布黃麾仗凡九十。分左右各三行。左前第一行十五。黃蓋

一。紅大繖二。華蓋一。曲蓋一。紫方繖一。紅方繖一。雉扇四。朱團扇四。第二行十五。羽葆幢二。豹尾二。龍頭竿二。信幡二。傳教幡二。告止幡二。絳引幡二。黃麾一。第三行十五。戟斨五。戈斨五。儀鎧斨五。右前第一行十五。黃蓋一。紅大繖二。華蓋一。曲蓋一。紫方繖一。紅方繖一。雉扇四。朱團扇四。第二行十五。羽葆幢二。豹尾二。龍頭竿二。信幡二。傳教幡二。告止幡二。絳引幡二。黃麾一。第三行十五。戟斨五。戈斨五。儀鎧斨五。皆校尉擊執。丹陛左右。拱衛司陳幢節等仗九十。分左右為四行。左前第一行。響節十二。金節三。燭籠三。第二行。青龍幢一。班劍三。吾杖三。立瓜三。臥瓜三。儀刀三。鐙杖三。戟三。骨朶三。朱雀幢一。右前第一行。響節十二。金節三。燭籠三。第二行。白虎

幢一班。劔三。吾杖三。立瓜三。臥瓜三。儀刀三。鐙杖三。戟三。骨
朶三。立武幢一。皆校尉擊執。奉天殿門左右。拱衛司陳設左
行圓蓋一。金脚踏一。金水盆一。團黃扇三。紅扇三。右行圓蓋
一。金交椅一。金水罐一。團黃扇三。紅扇三。皆校尉擊執。殿上
左右。內使監陳設左拂子二。金唾壺一。金香合一。右拂子二。
金唾盂一。金香爐一。皆內使擊執。和聲郎陳樂於丹墀。文武
官拜位之南。其器數詳見樂志內。三年。命製郊丘祭祀拜褥。
郊丘用席表蒲裏爲褥。宗廟社稷。先農山川。用紅文綺表。紅
木棉布裏爲褥。十二年。命禮部增設丹墀儀仗。黃繖華蓋。曲
蓋。紫方繖。紅方繖各二。雉扇紅團扇各四。羽葆幢龍頭竿。絳
引傳教告止信旛各六。戟。斨。戈。斨。鎗。各十。永樂元年。禮部

言鹵簿中宜有九龍車一乘。請增置。帝曰。禮貴得中。過爲奢。
不及爲儉。先朝審之精矣。當遵用舊章。豈可輒有增益。以啓
後世之奢哉。九龍車。旣先朝所無。其仍舊便。宣德元年。更造
鹵簿儀仗。有具服幄殿一座。金交椅一。金脚踏一。金盆一。金
罐一。金馬杌一。鞍籠一。金香爐一。金香合一。金唾盂一。金唾
壺一。御杖二。擺錫明甲一百。副盔一百。弓一百。箭三千。刀一
百。其執事校尉。每人鵝帽。只孫衣。銅帶。鞞履鞋一副。常朝各
色羅掌扇四十。各色羅絹繖十。萬壽繖一。黃雙龍扇二。筵宴
銷金羅繖四。銷金雨繖四。金龍響節二十四。
皇后儀仗。洪武元年定。丹陛儀仗三十六人。黃麾二。戟五色。
繡旛六。戈五色。繡旛六。鎗五色。錦旛六。小雉扇四。紅雜花團

扇四。錦曲蓋二。紫方繖二。紅大繖四。丹墀儀仗五十八人。班
劍四。金吾杖四。立瓜四。臥瓜四。儀刀四。鐙杖四。骨朶四。斧四。
響節十二。錦花蓋二。金交椅一。金脚踏一。金水盆一。金水罐
一。方扇八。宮中常用儀衛二十人。內使八人。色繡旛二。金斧
二。金骨朶二。金交椅一。金脚踏一。宮女十二人。金水盆一。金
水罐一。金香爐一。金香合一。金唾壺一。金唾盂一。拂子二。方
扇四。永樂元年增製紅杖一對。太皇太后皇太后儀仗俱同。
皇太子儀仗。洪武元年定。門外中道設龍旗六。其執龍旗者
竝戎服黃旗一。居中。左前青旗一。右前赤旗一。左後黑旗一。
右後白旗一。每旗執弓弩軍士六人。服各隨旗色。殿下設三
十六人。絳引旛二。戟斨六。戈斨六。鎗斨六。羽葆幢六。青方繖

二。青小方扇四。青雜花團扇四。皆校尉擎執。殿前設四十八
人。班劍四。吾杖四。立瓜四。臥瓜四。儀刀四。鐙杖四。骨朶四。斧
四。響節十二。金節四。皆校尉擎執。殿門設十二人。金交椅一。
金脚踏一。金水罐一。金水盆一。青羅團扇六。紅圓蓋二。皆校
尉擎執。殿上設六人。金香爐一。香合一。唾盂一。唾壺一。拂子
二。皆內使擎執。永樂二年。禮部言。東宮儀仗。有司失紀載。視
親王差少。宜增製金香爐。金香合一。及二。義二。傳教告止
信旛各二。節二。幢二。夾稍二。稍刀盾各二十。戟八。紅紙油燈
籠六。紅羅銷金邊圓繖。紅羅繡圓繖各一。紅羅曲蓋繡繖。紅
羅素圓繖。紅羅素方繖。青羅素方繖各二。紅羅繡孔雀方扇。
紅羅繡四季花團扇各四。拂子二。唾盂唾壺各一。鞍籠一。誕




馬八。紅令旗二。清道旗四。幟弩一。白澤旗二。弓箭二十副。從之。

親王儀仗。洪武六年定。宮門外設方色旗二。青色白澤旗二。執人服隨旗色。竝戎服。殿下絳引旛二。戟斨二。戈斨二。鎗斨二。皆校尉執。殿前班劔二。吾杖二。立瓜二。臥瓜二。儀刀二。鐙杖二。骨朶二。斧二。響節八。皆校尉執。殿門交椅一。脚踏一。水罐一。水盆一。團扇四。蓋二。皆校尉執。殿上拂子二。香爐一。香合一。唾壺一。唾盂一。十六年。詔親王儀仗內。交椅盆罐用銀者。悉改用金。建文四年。禮部言親王儀仗。合增紅油絹銷金兩繖一。紅紗燈籠。紅油紙燈籠各四。魴燈二。大小銅角四。從之。永樂三年。命工部。親王儀仗內。紅銷金繖。仍用寶珠龍文。

凡世子儀仗同。

郡王儀仗。令旗二。清道旗二。幟弩一。刀盾十六。弓箭十八副。絳引傳教。告止信旛各二。吾杖儀刀。立瓜臥瓜。骨朶斧各二。戟十六。稍十六。麾一。幢一。節一。響節六。紅銷金圓繖一。紅圓繖一。紅曲柄繖二。紅方繖二。青圓扇四。紅圓扇四。誕馬四。鞍籠一。馬杌一。拂子二。交椅一。脚踏一。水盆一。水罐一。香爐一。紅紗燈籠二。魴燈二。帳房一座。

皇妃儀仗。紅杖二。清道旗二。絳引旛二。戈斨戟斨儀鎗斨。吾杖儀刀。班劔立瓜臥瓜。鐙杖骨朶金鈸各二。響節四。青方繖四。紅繡圓繖一。繡方扇四。紅花圓扇四。青繡圓扇四。交椅一。脚踏一。拂子二。水盆一。水罐一。香爐一。香合一。唾盂一。唾壺一。



一。紅紗燈籠四。

東宮妃儀仗。紅杖二。清道旗二。絳引旛二。儀鎧。鎧戈。鎧戟。鎧吾杖。儀刀。班劍。立瓜。臥瓜。鐙杖。骨朶。金鉞各二。響節四。青方繖二。紅素圓繖二。紅繡圓繖一。紅繡方扇四。紅繡花圓扇四。青繡圓扇四。交椅一。脚踏一。拂子二。水盆一。水罐一。香爐一。香合一。紅紗燈籠四。永樂二年。禮部言。東宮妃儀仗。如親王妃。惟香爐。香合。如中宮。但不用金。其水盆。水罐。皆用銀。從之。親王妃儀仗。紅杖二。清道旗二。絳引旛二。戟。鎧。吾杖。儀刀。班劍。立瓜。臥瓜。骨朶。鐙杖各二。響節四。青方繖二。紅綵畫雲鳳繖一。青孔雀圓扇四。紅花扇四。交椅一。脚踏一。水盆一。水罐一。紅紗燈籠四。拂子二。公主世子妃。儀仗俱同。

郡王妃儀仗。紅杖二。清道旗二。絳引旛二。戟。鎧。吾杖。班劍。立瓜。骨朶各二。響節二。青方繖二。紅圓繖一。青圓扇二。紅圓扇二。交椅一。脚踏一。脚踏一。拂子二。紅紗燈籠二。水盆一。水罐一。郡主儀仗。紅杖二。清道旗二。班劍。吾杖。立瓜。骨朶各二。響節二。青方繖一。紅圓繖一。青圓扇二。交椅一。脚踏一。脚踏一。水盆一。水罐一。紅紗燈籠二。拂子二。舊例。郡王妃儀仗。有交椅。馬杌。皆木質。銀裏。水盆。水罐。及香爐。香合。皆銀質。抹金。量折銀三百二十兩。郡王妃儀仗。有交椅等大器。量折銀一百六十兩。餘皆自備。充用。嘉靖四十四年。定除親王及親王妃。初封儀仗。照例。頒給外。其初封郡王。及郡王妃。折銀等項。併停止。萬曆十年。定。郡王初封。係帝孫者。儀仗照例全給。係王孫

者免蓋宗室分封漸多勢難徧給也

明史藁

第四十六終

明史藁

志第四十七

光祿大夫 經筵講官明史總裁戶部尚書加七級臣王鴻緒奉
敕編撰

輿服一

- | | | |
|-----------|-----|--------|
| 大輅 | 玉輅 | 大馬輦 |
| 小馬輦 | 步輦 | 大涼步輦 |
| 板輅 | 耕根車 | 后妃車輿 |
| 皇太子親王以下車輿 | | 公卿以下車輿 |
| 繖蓋 | 鞍轡 | |

有媯御天下車服以庸夏則黻冕致美商則大輅示儉成周
有巾車典輅弁師司服之職天子以之表式萬邦而服車五

乘下逮臣民。漢承秦制。御金根爲乘輿。服衿立以承大祀。東都乃有九旂雲罕。旒冕絢履之儀物。踵事增華。日新代異。江左偏安。玉輅棲寶鳳。采眊銜金龍。其服冕也。或飾翡翠珊瑚。雜珠。豈古所謂法駕法服者哉。唐武德間。著車輿衣服之制。上得兼下。下不得擬上。宋初衮冕不綴珠玉。政和中。詔修車輅。竝建旂常。議禮局所釐定。用爲成憲。蓋帝輿莫重於輅。帝服莫重於冕。雖稍有損益。而原本周官。則唐宋無異軌焉。元制郊祀。則駕玉輅。服衮冕。巡幸或乘象輅。四時質孫之服。各隨其宜。明太祖甫有天下。考定邦禮。辨車輅而不用五輅。被冕服而不用五冕。酌古通今。合乎禮意。而拘儒往往疑之。夫鈎車木輅。夏殷已有。殊規九章。十二章。虞周不必同服。如必

備玉輅。而始郊。服大裘於夏至。則無因時變通之道。安貴帝王之創制。顯庸乎。迄乎世宗。藉田造耕根。燕居服燕弁。講武用武弁。更爲忠靜冠。以風有位。爲保和冠。以親宗藩。亦一王之制也。若夫前代繖扇鞍勒之儀。門戟旌節之屬。咸別等威。至宋加密。明初儉德。開基宮殿落成。不用文石。甃地。以此坊民。武臣猶有奢僭者。牀幔飾以金龍。馬廐用九五間數。而豪民亦或鎔金爲酒器。飾以玉珠。太祖皆重懲其弊。乃命儒臣稽古講禮。定官民服舍器用制度。歷代守之。遞有禁例。茲以朝家冊寶。中外符信。及宮室器用之等差。附敘於輿服之後焉。

天子車輅。明初大朝會。則拱衛司設五輅於奉天門。玉居中。

左金次革。右象次木。駕出則乘玉輅。後有腰輿。以八人載之。其後太祖考周禮五輅。以詢儒臣曰。玉輅太多。何若祇用木輅。博士詹尚對曰。孔子云。乘殷之輅。卽木輅也。太祖曰。以玉飾車。古惟祀天用之。常乘宜用殷輅。然祀天雖未備。亦可參政。張昶曰。木輅戎輅也。不可以祀。太祖曰。孔子斟酌四代禮樂。以爲萬世法。木輅寧不可祀。祀在誠敬。豈泥儀文。洪武元年。有司奏。乘輿服御。應以金飾。詔用銅。有司言。費小不足惜。太祖曰。朕富有四海。豈恡乎此。第儉約非身先。無以率下。且奢泰之習。未有不由小而至大者也。六年。命禮官考五輅制。爲木輅二乘。一以丹漆。祭祀用之。一以皮鞞。行幸用之。是冬大輅成。命更造大輅一。象輅十。中宮輅一。後宮車十。飾俱以

鳳。以將幸中立府。故造之。非常制也。二十六年。始定鹵簿大駕之制。玉輅一。大輅一。九龍車一。步輦一。後罷九龍車。永樂三年。更定鹵簿大駕。有大輅。玉輅。大馬輦。小馬輦。步輦。大涼步輦。板輦各一。具服幄殿各一。按周制。大輅越席。金玉二輅。以金玉飾諸末而已。漢乘輿則制金烏於衡上。又有金華玉蚤。珠絡翠羽之飾。唐金玉二輅。飾如周。而五輅又俱有金鳳旂。金龍銜綬。宋飾輅以金玉。又有銀龍二。銀鳳十二。馬有金面。元玉輅有金裝井藻。玉行龍十。玉蹲龍十。軾前二玉龍。奉一水精珠。至明大駕玉輅。惟祀天用之。常乘幸用木輅。施彩髹。盡去珠玉。

大輅高一丈三尺九寸五分。廣八尺二寸五分。輅座高四尺

一寸有奇。上平盤前後。車櫛并雁翅。及四垂如意滴珠板。轅長二丈二尺九寸有奇。紅髹鍍金銅。龍頭龍尾龍鱗。葉片裝釘。平盤下方箱。四周紅髹匡。俱十二榻。內飾綠地描金。繪獸六。麟。狻。猊。犀。象。天馬。天祿。禽。六。鸞。鳳。孔雀。朱雀。翟。鶴。盤左右。下有護泥板。及車輪二。貫軸一。每輪輻十有八。其輞皆紅髹。抹金銅。鈹花葉片裝釘。輪內車心。用抹金銅。鈹蓮花瓣輪盤。裝釘。軸中纏黃絨。駕轅諸索。輅亭高六尺七寸九分。四柱長五尺八寸四分。檻座皆紅髹。前一柱。斲金。柱首寶相花。中雲龍文。下龜文錦。前左右有門。高五尺一寸九分。廣二尺四寸九分。四周裝雕木沉香色。描金香草板。十二片。門旁榻各二。及明杵俱紅髹。以抹金銅。鈹花葉片裝釘。榻編以黃線條。後

紅髹屏風上。雕描金雲龍五。紅髹板。斲金雲龍一。屏後地沈香色。上四榻。雕描金雲龍四。其次雲板如之。下三榻。雕描金雲龍三。其次雲板亦如之。俱抹金銅。鈹花葉片裝釘。亭內黃線條。編紅髹匡。軟座下蓮花墜石。上施花毯。紅錦褥。席。紅髹坐椅。靠背上雕描金雲龍一。下雕雲板一。紅髹福壽板一。并褥。椅中黃織金綺。靠坐褥。四圍椅。裹施黃綺帷幔。亭外青綺緣邊。紅簾十扇。輅頂并圓盤。高三尺有奇。鍍金銅。蹲龍頂帶。仰覆蓮座。垂攀頂黃線圓條。盤上以紅髹。其下外四面地沈香色。描金雲。內四角地青繪五彩雲。以青飾輅蓋。亭內貼金斗拱。承紅髹匡寶蓋。鬪以八頂。冒以黃綺。謂之黃屋。中并四周。繡五彩雲龍。九天輪三層。皆紅髹。上安雕木貼金邊耀葉。

板八十一片。內緣地雕木貼金雲龍文三層。間繪五彩雲。襯板八十一片。盤下四周黃銅釘裝。施黃綺瀝水三層。每層八十一摺。間繡五彩雲龍文。四角垂青綺絡帶。各繡五彩雲升龍。圓盤四角連輅坐板。用攀頂黃線圓條。并貼金木魚。輅亭前有左右轉角闌干二扇。後一字帶。左右轉角闌干一扇。皆紅髹。內嵌雕木貼金龍。間以五彩雲。三扇共十二柱。柱首雕木貼金蹲龍。及線金五彩蓮花。抱柱闌干。內四周布花毯。亭後樹太常旗二。以黃線羅為之。皆十有二旂。每旂內外繡升龍一。左旗腰繡日月北斗。竿首用鍍金銅龍首。右旗腰繡黻字。竿首用鍍金銅戟。各綴抹金銅鈴二。垂紅纓十二。纓上施抹金銅寶蓋。下垂青線帔。踏梯一紅髹。以抹金銅鈸花葉。

片裝釘。行馬架二紅髹。上有黃絨匾條。用抹金銅葉片裝釘。有黃絹幘衣。即遮塵油絹雨衣。青氈衣。及紅油合扇梯。紅油托。各一。輅以二象駕之。

玉輅亦駕以二象。制如大輅。而無平盤。下十二榻之飾。輅亭前二柱。飾以搏換。貼金升龍。屏風後無上四榻。雲龍。及雲板之飾。天輪內用青地雕木。飾玉色雲龍文。而太常旗及踏梯。行馬之類。悉與大輅同。

大馬輦。古者輦以人輓之。周禮巾車。后五輅。其一輦車。組輓。然縣師有車輦之稽。黍苗詩云。我任我輦。則臣民所乘。亦名輦。至秦始皇去其輪。而制乃尊。明諸輦有輪者。駕以馬。以別於步輦焉。其制高一丈二尺五寸九分。廣八尺九寸五分。轅長。

二丈五寸有奇。輦座高三尺四寸有奇。餘同大輅。輦亭高六尺四寸有奇。紅髹四柱。長五尺四寸有奇。檻座高與輅同。四周紅髹條環板。前左右有門。高五尺有奇。廣二尺四寸有奇。門旁榻各二。後榻三。及明杙皆紅髹。抹金銅鈹花葉片裝釘。榻心編以黃線條。亭內制與大輅同。第軟座上不用花毯。而用紅毯。亭外用紅簾十二扇。輦頂并圓盤。高二尺六寸有奇。上下俱紅髹。以青飾輦蓋。其銅龍蓮座。寶蓋黃屋。及天輪輦亭。制悉與大輅同。太常旗踏梯行馬之屬。亦同大輅。駕以八馬。備鞍韉鞦轡鈴纓之飾。

小馬輦視大馬輦。高廣皆減一尺。轅長一丈九尺有奇。餘同大馬輦。輦亭高五尺五寸有奇。紅髹四柱。長五尺四寸有奇。檻座紅髹四周條環板。前左右有門。高五尺。廣二尺二寸有奇。門旁榻各二。及明杙後屏風壁板。俱紅髹。用抹金銅鈹花葉片裝釘。亭底紅髹。上施紅花毯。紅錦褥席。外用紅簾四扇。駕以四馬。餘同大馬輦。

步輦者。古之步輓。明制高一丈二尺二寸有奇。廣八尺二寸有奇。輦座高三尺二寸有奇。四周雕木五彩雲。渾貼金龍板十二片。間以渾貼金仰覆蓮座下。雕木線金。五彩雲板十二片。轅四紅髹。中二轅。長三丈五尺九寸。左右二轅。長二丈九尺五寸有奇。俱以鍍金銅龍頭龍尾裝釘。輦亭高六尺三寸有奇。四柱長六尺二寸有奇。檻座紅髹。四周雕木沈香色。描金香草板十二片。抹金銅鈹花葉片裝釘。前左右有門。高五

尺七寸有奇。廣二尺四寸有奇。門旁紅髹十字榻。各二扇。雕飾沈香色。描金雲龍板八片。下雲板如其數。後紅髹屏風上。雕沈香色。描金雲龍五屏。後雕沈香色。描金雲龍板三片。又雲板如其數。俱用抹金銅釵花葉片裝釘。餘同馬輦。惟紅簾用十扇。輦頂并圓盤。高二尺六寸有奇。其蓮座輦蓋。天輪幪衣之屬。俱同馬輦。

大涼步輦。高一丈二尺五寸有奇。廣一丈二尺五寸有奇。四面紅髹匡。裝雕木五彩雲板二十片。間以貼金仰覆蓮座下。紅髹如意絲環板如其數。紅髹轅六。中二轅長四丈三尺五寸有奇。左右二轅長四丈有奇。外二轅長三丈六尺五寸有奇。前後俱飾以雕木貼金龍頭龍尾。輦亭高六尺五寸有奇。

廣八尺五寸有奇。四柱紅髹。前左右有門。高五尺八寸有奇。廣二尺五寸有奇。四周描金香草板十二片。門旁榻各二。後榻三。及明欵皆紅髹。編以黃線條。亭底上施墊氈。加紅錦褥。并席。紅髹坐椅一。四周雕木沈香色。描金寶相花。靠背褥。裊帷幔。與馬輦同。內設紅髹桌二。紅髹闌干香桌一。闌干四。柱首俱雕木貼金蹲龍。鍍金銅龍蓋。香爐一。并香匙。箸瓶。紅錦墩二。外紅簾三扇。輦頂高二尺七寸有奇。又鍍金銅寶珠頂帶。仰覆蓮座。高一尺三寸有奇。垂攀頂黃線圓條四。頂用丹漆。上冒紅氈。四垂。以黃氈爲如意雲黃氈緣條。四周施黃綺。瀝水三層。每層百三十二摺。間繡五彩雲龍文。或用大紅羅。冒頂。以黃羅爲如意雲緣條。瀝水亦用黃羅。頂下四周以紅

氈爲帷。黃氈緣條。四角鍍金銅雲。四亭內寶蓋繡五龍。頂以紅髹木匡。冒以黃綺爲黃屋。頂心四周繡雲龍各一。輦亭四角至輦座。用攀頂黃線圓條四。并貼金木魚。輦亭前左右轉角闌干二扇。後一字帶。轉角闌干一扇。皆紅髹雕木。渾貼金龍。間以五彩雲板。闌干內四周布席。其闌干十二柱之飾。及踏梯之屬。俱與馬輦同。

輦者。肩行之車。宋中興以後。皇后嘗乘龍肩輿。又以征伐道路險阻。詔百官乘輦。名曰竹輦。亦曰竹輿。元皇帝用象輦。駕以二象。至用紅板輦。則自明始也。其制高六尺九寸有奇。頂紅髹。近頂裝圓匡。房牕。鍍金銅火燄寶帶。仰覆蓮座。四角鍍金銅雲。朶輦扛二。前後以鍍金銅龍頭龍尾裝釘。有黃

絨墜角索。四周紅髹板。左右門二。用鍍金銅釘鉸。輦內紅髹匡坐椅一。福壽板一。并褥椅內黃織金綺靠坐褥。四周椅袞。下鋪席。并踏褥。有黃絹輦衣。油絹雨衣各一。青氈衣。紅氈緣條。雲子。嘉靖十三年謁廟。帝及后妃俱乘肩輿出宮。至奉天門。降輿升輅。隆慶四年。設郊祀慶成宴。帝乘板輿。由歸極門出。入皇極門。至殿上降輿。

車駕之出。有具服幄殿。按周官大小次木架輦障。上下四。周以幄帟。以象宮室。明鹵簿載具服幄殿。儀仗有黃帳房。仍元制也。帳并帷幕。以黃木棉布爲之。上施獸吻。柱竿紅髹。竿首彩裝蹲獅氈頂。

耕根車。世宗朝始造。漢有耕車。晉曰耕根車。俱天子親耕所

用嘉靖十年帝將耕藉田詔造耕根車禮官上言考大明集禮耕藉用宋制乘玉輅以耕根車載耒耜同行今考儀注順天府官奉耒耜及種稷種置彩輿先於祭前二日而出今用耕根車以載耒耜宜令造車於祭祀日早進呈置耒耜先玉輅以行第稽諸禮書祇有圖式而無高廣尺寸宜依今置車式差小通用青質從之

皇后輅高一丈一尺三寸有奇平盤前後車櫛竝雁翅四垂如意滴珠板轅長一丈九尺六寸皆紅髹轅用抹金銅鳳頭鳳尾鳳翎葉片裝釘平盤左右垂護泥板及輪二貫軸一每輪輻十有八皆紅髹輞以抹金釵花銅葉片裝釘輪內車轂用抹金銅釵蓮花瓣輪盤裝釘軸中纏黃絨駕轅諸索輅

亭高五尺八寸有奇紅髹四柱檻座上沈香色描金香草板十二片前左右有門高四尺五寸有奇廣二尺四寸有奇門旁沈香色線金菱花櫺各二下條環板有明欵抹金銅釵花葉片裝釘後紅髹五山屏風戲金鸞鳳雲文屏上紅髹板戲金雲文中裝雕木渾貼金鳳一屏後紅髹板俱用抹金銅釵花葉片裝釘亭底紅髹上施紅花毯紅錦褥席紅髹坐椅一靠背雕木線金五彩裝鳳一上下香草雲板各一紅福壽板一并褥椅中黃織金綺靠坐褥四周有椅褰施黃綺帷幔或黃羅外用紅簾十二扇前二柱戲金上寶相花中鸞鳳雲文下龜文錦輅頂并圓盤高二尺有奇抹金銅立鳳頂帶仰覆蓮座垂攀頂黃線圓條四盤上紅髹下四周沈香色描金雲文

內青地五彩雲文。以青飾輅蓋。內寶蓋紅髹匡。闌以八頂。冒以黃綺。頂心及四周。繡鳳九并五彩雲文。天輪三層紅髹。上雕木貼金邊耀葉板七十二片。內飾青地雕木五彩雲鸞鳳文。三層間繪五彩雲襯板七十二片。下四周黃銅裝釘。上施黃綺瀝水三層。間繡鸞鳳文。四垂青綺絡帶。繡鸞鳳各一。圓盤四角。連輅座板。用攀頂黃線圓條四。輅亭前後。有左右轉角闌干各二扇。內嵌條環板。皆紅髹。計十二柱。柱首雕木紅蓮花。線金青綠裝蓮花抱柱。其踏梯行馬之屬。與大馬輦同。安車。本周禮后五輅之一。應劭漢官鹵簿圖。有五色安車。晉皇后乘雲母安車。唐皇后安車制如金輅。明皇后安車獨簡素。其制高九尺七寸有奇。平盤前後。車櫺竝雁翅板。轅二。長

一丈六尺七寸有奇。皆紅髹。用抹金銅鳳頭鳳尾鳳翎葉片裝釘。平盤左右。垂護泥板。及輪二貫軸一。每輪輻十有八。皆紅髹。軸中纏黃絨。駕轅諸索。車亭高四尺四寸。紅髹方柱四。上裝五彩花板十二片。前左右有門。高三尺七寸有奇。廣二尺二寸有奇。門旁紅髹十字楅各二。後三山屏風。屏後壁板。俱紅髹。用抹金銅鍍花葉片裝釘。亭底紅髹板。上施紅花毯。紅錦褥。四周施黃綺帷幔。外用紅簾四扇。車蓋用紅髹抹金銅寶珠頂帶。蓮座高六寸。四角抹金銅鳳頭。用攀條四。竝紅髹木魚。蓋施黃綺瀝水三層。銷金鸞鳳文。鳳頭下垂紅帔。錯其踏梯行馬。幘衣與輅同。行障坐障。自唐宋有之。皇后重翟車後。皆有行障六。坐障三。左右夾車。宮人執之。而唐書宋史。

不載其制。金史行障長八尺高六尺。坐障長七尺高五尺。明皇后用行障坐障皆以紅綾爲之。繪升降鸞鳳雲文。行障繪瑞草於瀝水。坐障繪雲文於頂。

太皇太后皇太后輅及安車行障坐障制與皇后同。

皇妃車曰鳳輅。與歷代異名。其制青頂。上抹金銅珠頂。四角抹金銅飛鳳各一。垂銀香圓寶蓋。并彩結。輅身紅髹木匡。三面篋織紋簾。繪以翟文。抹金銅鈹花葉片裝釘。紅髹搨飾。以抹金銅鳳頭鳳尾。青銷金羅緣邊紅簾。并看帶內紅交牀。并坐踏褥。紅銷金羅轎衣一。頂用銷金寶珠文。瀝水香草文。看帶并幃皆鳳文。紅油絹雨轎衣一。自皇后以下皆用行障。二坐障一。第別以彩繪。皇妃行障坐障俱紅綾爲之。繪雲鳳而

行障瀝水繪香草。

皇太子金輅高一丈二尺二寸有奇。廣八尺九寸。轅長一丈九尺五寸。輅座高三尺二寸有奇。平盤滴珠板。輪輻輪輞悉同玉輅。輅亭高六尺四寸有奇。紅髹四柱長五尺四寸。檻座上四周線金五彩香草板。前左右有門高五尺有奇。廣二尺四寸有奇。門旁榻各二。編紅線條及明杵皆紅髹。後五山屏風青地上雕木貼金龍五。間以五彩雲文。屏後紅髹板皆抹金銅鈹花葉片裝釘。紅髹匡軟座。紅絨墜座大索四。下垂蓮花墜石。上施紅毯紅錦褥。席紅髹椅一。納板一。并褥椅中紅織金綺靠坐褥。四周有椅。裏施紅羅帷幔。外用青綺緣邊紅簾十二扇。椅雕貼金龍彩雲。下線金彩雲板一。亭內編紅線

條輅頂并圓盤高二尺五寸有奇。又鍍金銅寶珠頂帶。仰覆蓮座高九寸。垂攀頂紅線圓條四。盤上丹漆。下內外皆青地。繪雲文。以青飾輅蓋。亭內周圍青斗拱。承以丹漆。匡寶蓋。鬩以八頂。冒以紅綺。頂心繡雲龍一。餘繡五彩雲文。天輪三層。皆紅髹。上雕木貼金邊。耀葉板七十二片。內飾青地。雕木貼金雲龍文三層。間繪五彩雲觀板七十二片。四周黃銅裝釘。上施紅綺。瀝水三層。每層七十二摺。間繡五彩雲龍文。四角之飾。與大輅同。第圓條用紅線。輅亭前一字闌干一扇。後一字帶轉角闌干一扇。左右闌干二扇。內嵌五彩雲板。皆丹漆。計十四柱。柱首制與大輅同。亭後建紅旗二。以紅羅為之。九旂。每旂內外繡升龍一。左旗腰繡日月北斗。竿用抹金銅龍

首。右旗腰繡黻字。竿用抹金銅。戟綴抹金銅鈴二。垂紅纓。其踏梯行馬之屬。與玉輅同。帳房用青木棉布。竿首青綠蹲猊。餘同乘輿帳房。

東宮妃車。亦曰鳳輅。小輅制同。皇妃行障坐障之制亦同。親王象輅。其高視金輅減六寸。其廣減一尺。轅長視大輅減一尺。輅座高三尺有奇。餘飾同金輅。輅亭高五尺二寸有奇。紅髹四柱。檻座上四周紅髹條環板。前左右有門。高四尺五寸有奇。廣二尺二寸有奇。門旁楯各二。及明杙後五山屏風。皆紅髹。用抹金銅。鈹花葉片裝釘。亭底紅髹。施紅花毯。紅錦褥。席其椅靠坐褥。帷幔紅簾之制。俱同金輅。輅頂并圓盤。高二尺四寸有奇。用抹金銅寶珠頂。餘同金輅。天輪三層。皆紅

髹上雕木貼金邊耀葉板六十三片內飾青地雕木五彩雲文三層間繪五彩雲觀板六十三片四周黃銅裝釘上施紅綺瀝水三層每層八十一摺繡瑞草文前垂青綺絡帶二俱繡升龍五彩雲文圓盤四角連輅座板用攀頂紅線圓條四并紅髹木魚亭前後闌干同金輅左右闌干各一扇內嵌條環板皆紅髹計十四柱柱首雕木紅蓮花線金青綠裝蓮花抱柱前闌干內布花毯紅旗二與金輅所樹同竿上祇垂紅纓五其踏梯行馬之屬亦同金輅帳房用綠色螭頭餘與東宮同

親王妃車亦曰鳳輦小輦制俱同東宮妃惟鳳輦衣用木紅平羅小輦衣二一用礬紅素紵絲一用木紅平羅行障坐障

制同東宮妃

公主車宋用厭翟車明初因之其後定制鳳輦行障坐障如親王妃

皇孫車永樂中定皇太孫婚禮儀仗如親王降皇太子一等而用象輅

郡王無輅祇有帳房制同親王

郡王妃及郡主俱用翟輦制與皇妃鳳輦同第易鳳為翟行障坐障同親王妃而繪雲翟文

百官乘車之制洪武元年令凡車不得雕飾龍鳳文職官一品至三品用間金飾銀螭繡帶青縵四品五品素獅頭繡帶青縵六品至九品用素雲頭素帶青縵輦同車制庶民車及

轎竝用黑油。齊頭平頂。阜緞。禁用雲頭。六年令。凡車轎。禁丹漆。五品以上車。止用青緞。婦女許坐轎。官民老疾者。亦得乘之。景泰四年令。在京三品以上。得乘轎。弘治七年令。文武官例。應乘轎者。以四人舁之。其五府管事。內外鎮守。守備。及公侯。伯。都督等。不問老少。皆不得乘轎。違例乘轎。及擅用八人者。奏聞。蓋自太祖不欲勲臣廢騎射。雖上公出。必乘馬。永樂元年。駙馬都尉胡觀。越制乘晉王濟熿。朱轅。轎。爲給事中。周景所劾。有詔宥觀。而賜濟熿書。切責之。惟文職大臣乘轎。庶官亦乘馬。又文臣皆許乘車。大臣得乘安車。後久廢不用。正德四年。禮部侍郎劉機言。大明集禮。公卿大臣。得乘安車。因請定轎扇。繖蓋。品級等差。帝以京城內安車。繖蓋。久不行。

却其請。而命轎扇。俱如例行。嘉靖十五年。禮部尚書霍韜言。禮儀定式。京官三品以上。乘轎。邇者文官皆用肩輿。或乘女轎。乞申明禮制。俾臣下有所遵守。乃定四品下。不許乘轎。亦毋得用肩輿。隆慶二年。給事中徐尚。劾應城伯孫文棟等。乘轎出入。驕僭無狀。帝命奪文棟等俸。乃諭兩京武職。非奉特恩。不許乘轎。文官四品以下。用帷轎者。禁如例。萬曆三年。奏定勲戚及武臣。不許用帷轎。肩輿。并交牀上馬。至若破格殊典。則宣德中。少保黃淮。陪遊西苑。嘗乘肩輿入禁中。嘉靖間。嚴嵩奉詔苑直。年及八旬。出入得乘肩輿。武臣則郭勛。朱希忠。特命乘肩輿。扈南巡。蹕後。遂賜常乘焉。皆非制也。繖蓋之制。洪武元年令。庶民不得用羅絹涼繖。但許用油紙。

雨繖三年令。京城內一品二品用繖蓋。其餘用雨繖。十六年令。尚書侍郎。左右都御史。通政使。太常卿。應天府尹。國子祭酒。翰林學士。許張繖蓋。二十六年定。一品二品。繖用銀浮屠頂。三品四品。用紅浮屠頂。俱用黑色茶褐羅表。紅絹裏三簷。雨繖用紅油絹。五品紅浮屠頂。青羅表。紅絹裏兩簷。雨繖同。四品六品至九品。用紅浮屠頂。青絹表。紅絹裏兩簷。雨繖俱用油紙。三十五年。官員繖蓋。不許用金繡朱丹裝飾。公侯駙馬伯。與一品二品同。成化九年令。兩京官遇雨。任用油繖。其涼繖。不許張於京城。

用銀鍍鐵事件。靴用油畫。六品至九品。用擺錫鐵事件。靴用油畫。三十五年。官民人等。馬領下纓。并鞦轡。俱用黑色。不許紅纓。及描金嵌金。天青朱紅裝飾。軍民用鐵事件。黑綠油靴。

明史彙

志第四十七終

Blank page with vertical lines for text.

明史藁

志第四十八

光祿大夫 經筵講官明史總裁戶部尚書加七級臣王鴻緒奉
敕編撰

輿服二

皇帝冕服

后妃冠服

皇太子親王以下冠服

皇帝冕服。洪武元年。學士陶安請製五冕。太祖曰。此禮太繁。祭天地宗廟服衮冕。社稷等祀服通天冠絳紗袍。餘不用。三年更定。正旦冬至聖節。並服衮冕。祭社稷先農冊拜。亦如之。十六年。定衮冕之制。冕前圓後方。玄表纁裏。前後各十二旒。旒五采玉十二珠。五采纁十有二就。就相去一寸。紅絲組爲

纓。黼纁充耳玉簪導。袞立衣黃裳十二章。日月星辰山龍華蟲六章織於衣。宗彝藻火粉米黼黻六章繡於裳。白羅大帶紅裏。蔽膝隨裳色。繡龍火山文。玉革帶玉佩。大綬六采。赤黃黑白縹綠。小綬三色。同大綬。間施三玉環。白羅中單。黻領青緣襖。黃鞮黃舄金飾。二十六年更定袞冕十二章。冕版廣一尺二寸。長二尺四寸。冠上有覆。立表朱裏。餘如舊制。圭長一尺二寸。袞立衣。纁裳十二章如舊制。中單以素紗為之。紅羅蔽膝。上廣一尺。下廣二尺。長三尺。織火龍山三章。革帶佩玉。長三尺三寸。大帶素表朱裏。兩邊用緣。上以朱錦。下以綠錦。大綬六采。黃白赤玄縹綠織成。純玄質五百首。凡合單紡為一系。四系為一扶。五扶為一首。小綬三色。同大綬。間織三玉環。朱鞮赤舄。永樂三年定。冕

冠以皂紗為之。上覆曰緹。桐板為質。衣之以綺。立表朱裏。前圓後方。以玉衡維冠。玉簪貫紐。紐與冠武。足前體下曰武。綬在冠之下。亦曰武。并繫纓處。皆飾以金。緹以左右垂。黼纁充耳。用黃玉。繫以立統。承以白玉瑱。朱紘。餘如舊制。玉圭長一尺二寸。剡其上刻山四。以象四鎮之山。蓋周鎮圭之制。異於大圭不琢者也。以黃綺約其下。別以囊韜之。金龍文袞服十有二章。立衣八章。日月龍在肩。星辰山在背。火華蟲宗彝在袖。每袖各三。皆織成本色。領標襖裾。標者袖端。襖者衣緣。纁裳四章。織藻粉米黼黻各二。前三幅後四幅。前後不相屬。其腰有辟積。本色緹。襖側有純。謂之者緣也。中單以素紗為之。青領標襖裾。領織黻文十三。蔽膝隨裳色。四章織藻粉米黼黻各二。本色緣。有紉施於縫中。玉

鉤二玉佩二。各用玉珩一。瑀一。琥一。瑁一。璜二。瑀下垂玉
 花一。玉滴二。珠飾雲龍文。描金。自珩而下。繫組五貫。以玉珠
 行則衝牙二滴。與璜相觸。有聲。金鉤二。有二小綬。六采。黃白赤玄
縹綠。縹質。三小綬。色同大綬。間施三玉環。龍文。皆織成。鞵。烏皆
 赤色。烏用黑。絢純。以黃飾烏首。嘉靖八年。諭閣臣張璁。袞冕
 有革帶。今何不用。璁對曰。按陳祥道禮書。古革帶大帶。皆謂
 之鞶。革帶以繫佩。然後加以大帶。而笏摺於二帶之間。夫
 革帶前繫。後繫。左右繫。佩自古冕弁恆用之。今惟不用
 革帶。以至前後佩服。皆無所繫。遂附屬裳要之間。失古制矣。
 帝曰。冕服祀天地。享祖宗。若闕革帶。非齊明盛服之意。及觀
 會典。載蔽膝用羅。上織火山龍三章。并大帶緣用錦。皆與今

所服不合。卿可併革帶繫蔽膝。佩綬之式。詳考繪圖以進。又
 云。衣裳分上下服。而今衣恆掩裳。裳制如帷。而今兩幅。朕意
 衣但當與裳要下齊。而露裳之六章。何如已。又諭璁以變更
 祖制為疑。璁對曰。臣考禮制。衣不掩裳。與聖意允合。夫衣六
 章。裳六章。義各有取。衣自不容掩裳。大明集禮及會典。與古
 制不異。今衣八章。裳四章。故衣常掩裳。然於典籍無所準。內
 閣所藏圖註。蓋因官司織造。循習訛謬。今訂正之。乃復祖制。
 非有變更。帝意乃決。因復諭璁曰。衣有六章。古以繪。今當以
 織。朕命織染局。考國初冕服。日月各徑五寸。當從之。裳六章。
 古用繡。亦當從之。古色用玄黃。取象天地。今裳用縹。於義無
 取。當從古。革帶即束帶。後當用玉。以佩。綬繫之於下。蔽膝隨

裳色其繡上龍下火。可不用山。卿與內閣諸臣同考之。於是楊一清等詳議袞冕之服。自黃虞以來。玄衣黃裳。爲十二章。日月星辰山龍華蟲。其序自上而下。爲衣之六章。宗彝藻火粉米黼黻。其序自下而上。爲裳之六章。自周以後。寢變其制。或八章或九章。已戾於古矣。我太祖皇帝復定爲十二章之制。司造之官仍習舛訛。非制作之初意。伏乞聖斷不疑。帝乃令擇吉更正。其制冠以圓匡。烏紗冒之。旒綴七采玉珠十二。青纒充耳。綴玉珠二。餘如舊制。玄衣黃裳。衣裳各六章。洪武間舊制。日月徑五寸。裳前後連屬如帷。六章用繡。蔽膝隨裳色。羅爲之。上繡龍一。下繡火三。繫於革帶。大帶素表。朱裏。上緣以朱。下以綠。革帶前用玉。其後無玉。以佩綬繫而掩之中。

單及圭。俱如永樂間制。朱鞵赤舄。黃條緣。玄纓結。

皇帝通天冠服。洪武元年定郊廟省牲。皇太子諸王冠婚醮戒。則服通天冠絳紗袍。冠加金博山。附蟬十二。首施珠翠。黑介幘。組纓玉簪導。深衣製。白紗內單。阜領襍襖。絳紗蔽膝。白假帶。方心曲領。白鞵赤舄。革帶佩綬。與袞服同。

皇帝皮弁服。朔望視朝。降詔降香進表。四夷朝貢。外官朝覲。策士傳臚。皆服之。嘉靖以後。祭太歲山川諸神。亦服之。其制自洪武二十六年定。皮弁用烏紗冒之。前後各十二縫。每縫綴五采玉十二。以爲飾。玉簪導。紅組纓。絳紗衣。蔽膝。隨衣色。白玉佩。革帶。玉鈎。緋白大帶。白鞵。黑舄。永樂三年定。皮弁如舊制。惟縫及冠武弁貫簪繫纓處。皆飾以金玉。圭長如冕。

服之圭有脊并雙植文絳紗袍本色領襍襖裾紅裳但不織章數中單紅領襍襖裾餘俱如冕服內制。

皇帝武弁服明初親征遣將服之嘉靖八年諭閣臣張璁云會典紀親征類禡之祭皆具武弁服不可不備璁對周禮有韋弁謂以韎韋爲弁又以爲衣裳國朝視古損益有皮弁之制今武弁當如皮弁但皮弁以黑紗冒之武弁當以絳紗冒之隨其圖以進帝報曰覽圖有鞞形但無繫處冠制古象上尖今皮弁則圓朕惟上銳取其輕利當如古制又衣裳鞞鳥皆赤色何謂且佩綬俱無於祭用之可乎璁對自古服冕弁俱用革帶以前繫鞞後繫綬韋弁之鞞正繫於革帶耳武事尚威烈故色純用赤帝復報璁冠服衣裳鞞鳥俱如古制增

革帶佩綬及圭乃定制弁上銳色用赤上十二縫中綴五采玉落落如星狀韎衣韎裳韎鞞俱赤色佩綬革帶如常制佩綬及韎鞞俱上繫於革帶鳥如裳色玉圭視鎮圭差小刻上方下有篆文曰討罪安民

皇帝常服洪武三年定烏紗折角向上巾盤領窄袖袍束帶間用金琥珀透犀永樂三年更定冠以烏紗冒之折角向上其後名翼善冠袍黃盤領窄袖前後及兩肩各織金盤龍一帶用玉鞞以皮爲之先是洪武二十四年嘗微行至神樂觀見道士有結網巾者翼日命取網巾十三項頒示十三布政使司人無貴賤皆裹網巾於是天子亦常服網巾又會典載皇太孫冠禮有云掌冠跪加網巾而皇帝皇太子冠禮俱闕

而不載。嘉靖七年更定燕弁服。初帝以燕居冠服尚沿習俗。諭張璁考古帝王燕居法服之制。璁乃采禮書玄端深衣之文。圖註以進。帝爲參定其制。諭璁詳議。璁言古者冕服之外。玄端深衣。其用最廣。玄端自天子達於士。國家之命服也。深衣自天子達於庶人。聖賢之法服也。今以玄端加文飾。不易舊制。深衣易黃色。不離中衣。誠得帝王損益時中之道。帝因諭禮部曰。古玄端上下通用。今非古人比。雖宴居宜辨等威。因酌古制。更名曰燕弁。寓深宮獨處。以燕安爲戒之意。其制冠匡如皮弁之制。冒以烏紗。分十有二瓣。各以金線壓之前。飾五采玉雲各一。後列四山。朱條爲組纓。雙玉簪。服如古玄端之制。色玄。邊緣以青。兩肩繡日月。前盤圓龍一。後盤方龍

二。邊加龍文八十一。領與兩袂共龍文五九。袷同前後齊。共龍文四九。襯用深衣之制。色黃。袂圓袂方。下齊。負繩及踝。十二幅。素帶朱裏。青表。綠緣。邊腰圍飾以玉龍九。玄履朱緣紅纓。黃結白鞵。

皇后冠服。洪武三年定。受冊謁廟朝會服。禮服。其冠圓匡。冒以翡翠。上飾九龍四鳳。大花十二樹。小花數如之。兩博鬢。十二鈿。褱衣深青。繪翟赤質。五色十二等。素紗中單。黻領。朱羅縠。襖。襖。蔽膝。隨衣色。以緞爲領緣。用翟爲章三等。大帶。隨衣色。朱裏。紕其外。上以朱錦。下以綠錦。紐約用青組。玉革帶。青鞵。青舄。以金飾。永樂三年定制。飾翠龍九。金鳳四。中一龍銜大珠一。上有翠蓋。下垂珠結。餘皆口銜珠滴。珠翠雲四十

片。大珠花小珠花數如舊。三博鬢飾以金龍翠雲。皆垂珠滴。翠口圈一副。上飾珠寶鈿花十二。翠鈿如其數。托裏金口圈一副。珠翠面花五事。珠排環一對。阜羅額子一。描金龍文。用珠二十一。翟衣深青織翟文十有二等。間以小輪花。紅領襖。襖裾織金雲龍文。中單玉色紗為之。紅領襖。織蔽文十。蔽膝隨衣色。織翟為章三等。間以小輪花四。以緞為領緣。織金雲龍文。玉縠圭長七寸。刺其上。瑒縠文黃綺約其下。韜以黃囊金龍文。玉革帶青綺鞞。描金雲龍文。玉事件十。金事件四。大帶表裏俱青紅相半。末純紅下垂。織金雲龍文。上朱緣下綠緣。青綺副帶一。綬五采。黃赤白縹綠纁質。間施二玉環。皆織成。小綬三色。同大綬。玉佩二。各用玉珩一。瑀一。琚二。

衝牙一。璜二。瑀下。垂玉花一。玉滴二。瑒飾雲龍文。描金。自珩而下。繫組五。貫以玉珠。行則衝牙二滴。與二璜相觸。有聲。上有金鈎。有小綬五采。以副之。纁質織成。青鞞。寫飾以描金雲龍。阜線純。每寫首加珠五顆。

皇后常服。洪武三年定。雙鳳翊龍冠。首飾釧鐲。用金玉珠寶。翡翠諸色。團衫。金繡龍鳳文。帶用金玉。四年更定。龍鳳珠翠冠。真紅大袖衣。霞帔。紅羅長裙。紅褙子。冠制如特髻。上加龍鳳飾。衣用織金龍鳳文。加繡飾。永樂三年更定。冠用阜縠。附以翠博山。上飾金龍一。翊以珠翠鳳二。皆口銜珠滴。前後珠牡丹二花。八蕊。翠葉三十六。珠翠穠花鬢二。珠翠雲二十一。翠口圈一。金寶鈿花九。飾以珠金鳳二。口銜珠結。三博鬢飾。

以鸞鳳金寶鈿二十四邊垂珠滴金簪二珊瑚鳳冠背一副大衫霞帔衫黃霞帔深青織金雲霞龍文或繡或鋪翠圈金飾以珠玉墜子瑑龍文四袂襖子即稍深青金繡團龍文鞠衣紅色前後織金雲龍文或繡或鋪翠圈金飾以珠大帶紅線羅為之有緣餘或青或綠各隨鞠衣色緣襖襖子黃色紅領標襖裙皆織金采色雲龍文緣襖袞紅色緣緣襖織金采色雲龍文玉帶如翟衣內制第減金事件一玉花采結綬以紅綠線羅為結玉綬花一瑑雲龍文綬帶玉墜珠六金垂頭花瓣四小金葉六紅線羅繫帶一白玉雲樣玳瑁二如佩制有金鈎金如意雲蓋一下懸紅組五貫金方心雲板一俱鈿雲龍文襯以紅綺下垂金長頭花四中小金鐘一末綴白玉

雲朶五青鞵舄與翟衣內制同。

皇妃皇嬪及內命婦冠服洪武三年定皇妃受冊助祭朝會禮服冠飾九翬四鳳花釵九樹小花數如之兩博鬢九鈿翟衣青質繡翟編次於衣及裳重為九等青衫中單黻領朱縠標襖裙蔽膝隨裳色加文繡重雉為章二等以緞為領緣大帶隨衣色玉革帶青鞵舄佩綬常服鸞鳳冠首飾釧鐲用金玉珠寶翠諸色團衫金繡鸞鳳不用黃帶用金玉犀又定山松特髻假鬢花鈿或花釵鳳冠真紅大袖衣霞帔紅羅袞褙子衣用織金及繡鳳文永樂三年更定禮服九翟冠二以阜穀為之附以翠博山飾大珠翟二小珠翟三翠翟四皆口銜珠滴冠中寶珠一座翠頂雲一座其珠牡丹翠穠花鬢之屬

俱如雙鳳翊龍冠制。第減翠雲十。又翠牡丹花。穠花各二。面
花四。梅花環四。珠環各二。其大衫霞帔。燕居佩服之飾。俱同
中宮。第織金繡。珠。俱雲霞鳳文。不用雲龍文。九嬪冠服。嘉靖
十年始定。冠用九翟。次皇妃之鳳。大衫鞠衣。如皇妃制。圭用
次玉。穀文。內命婦冠服。洪武五年定。三品以上。花釵翟衣。四
品五品。山松特髻。大衫為禮服。貴人視三品。以皇妃燕居冠。
及大衫霞帔為禮服。以珠翠慶雲冠。鞠衣。褶子。緣襖。襖。為
常服。

宮人冠服。制與宋同。紫色團領窄袖。徧刺折枝小葵花。以金
圈之。珠絡縫。金帶紅褰。弓樣鞵。上刺小金花。烏紗帽飾以花。
帽額綴團珠。結珠鬢梳。垂珠耳飾。

皇太子冠服。陪祀天地社稷宗廟。及大朝會受冊納妃。則服
袞冕。洪武二十六年定。袞冕九章。冕九旒。旒九玉。金簪導。紅
組纓。兩玉瑱。圭長九寸五分。玄衣纁裳。衣五章。織山龍華蟲
宗彝火。裳四章。織藻粉米黼黻。白紗中單。黻領。蔽膝。隨裳色。
織火山二章。革帶金鈎。玉佩。纓五采。赤白玄纁織成純赤質。
三百三十首。小纓三色同。間織三玉環。大帶白表朱裏。上緣
以紅。下緣以綠。白鞵赤舄。永樂三年定。冕冠玄表朱裏。前圓
後方。前後各九旒。每旒五采。纁九就。貫五采玉九。赤白青黃
黑相次。玉衡金簪。玄統垂青纁。充耳。用青玉承以白玉瑱。朱紘
纓。玉圭長九寸五分。以錦約其下。并鞵。袞服九章。玄衣五章。
龍在肩。山在背。火華蟲宗彝在袖。每袖各三皆織成本色。領標襖。

裾纁裳四章。織藻粉米黼黻各二。前三幅後四幅不相屬。共腰有襜積。本色裊裼。中單以素紗爲之。青領襌襜。領織黻文十一。蔽膝隨裳色。四章織藻粉米黼黻。本色緣。有紉施於縫中。上玉鈎二。玉佩二。各用玉珩一。瑀一。瑑一。璜一。璜二。瑀下垂。玉花一。玉滴二。瑑雲龍文。描金。自珩而下。繫組五。貫以玉珠。上有金鈎。小綬四采。赤白縹綠以副之。纁質大帶。素表朱裏。在腰及垂皆有裊。上裊以朱。下裊以綠。紐約用青組。大綬四采。赤白縹綠纁質。小綬三采。間施二玉環。龍文皆織成。鞵舄皆赤色。舄用黑絢。純黑飾舄首。朔望朝降詔降香進表。外國朝貢朝覲。則服皮弁。永樂三年定。皮弁冒以烏紗。前後各九縫。每縫綴五采玉九。縫及冠武。并貫簪繫纓處。皆飾以金。金簪

朱纓。玉圭如冕服內制。絳紗袍。本色領。襌襜。裾。紅裳如冕服內制。但不織章數。中單以素紗爲之。如深衣制。紅領。襌襜。裾。領織黻文十一。蔽膝隨裳色。本色緣。有紉施於縫中。其上玉鈎二。玉佩如冕服內制。但無雲龍文。有小綬四采。以副之。大帶大綬。鞵舄赤色。皆如冕服內制。其常服。洪武元年定。烏紗折上中。永樂三年定。冠烏紗折角向上中。亦名翼善冠。親王郡王及世子俱袍赤盤領窄袖。前後及兩肩各金織蟠龍一。玉帶鞵以皮爲之。

皇太子妃冠服。洪武三年定。禮服與皇妃同。永樂三年更定。九翬四鳳冠。漆竹絲爲匡。冒以翡翠。上飾翠翬九。金鳳四。皆口銜珠滴。珠翠雲四十片。大珠花九樹。小珠花數如之。雙博

鬢飾以鸞鳳皆垂珠滴翠口圈一副上飾珠寶鈿花九翠鈿如其數托裏金口圈一副珠翠面花五事珠排環一對珠阜羅額子一描金鳳文用珠二十一翟衣青質織翟文九等間以小輪花紅領襖裙織金雲鳳文中單玉色紗爲之紅領襖裙領織黻文十一蔽膝隨衣色織翟爲章二等間以小輪花三以緞爲領緣織金雲鳳文其玉圭帶綬玉佩鞞舄之制俱同皇妃洪武三年又定常服犀冠刻以花鳳首飾釧鐲衫帶俱同皇妃四年定冠亦與皇妃同永樂三年定燕居冠以阜穀爲之附以翠博山上飾寶珠一座翊以二珠翠鳳皆口銜珠滴前後珠牡丹二花八蕊翠葉三十六珠翠穰花鬢二珠翠雲十六片翠口圈一副金寶鈿花九上飾珠九金鳳

一對口銜珠結雙博鬢飾以鸞鳳金寶鈿十八邊垂珠滴金簪一對珊瑚鳳冠背一副其大衫霞帔燕居佩服之飾俱同皇妃。

親王冠服助祭謁廟朝賀受冊納妃服袞冕朔望朝降詔降香進表四夷朝貢朝覲服皮弁洪武二十六年定冕服俱如東宮第冕旒用五采玉圭長九寸二分五釐青衣纁裳永樂三年又定冕服皮弁制俱與東宮同其常服亦與東宮同嘉靖七年諭禮部朕仿古立端自爲燕弁冠服更制忠靜冠服錫於有位而宗室諸王制猶未備今酌燕弁及忠靜冠之制復爲式具圖命曰保和冠服自郡王長子以上其式已明鎮國將軍以下至奉國中尉及長史審理紀善教授伴讀俱用

忠靜冠服。依其品服之儀。賓及餘官。不許槩服。夫忠靜冠服之異式。尊賢之等也。保和冠服之異式。親親之殺也。等殺既明。庶幾乎禮之所保。保斯和。和斯安。此錫名之義也。其以圖說。頒示諸王府。如勅遵行。保和冠制。以燕弁爲準。用九袂去簪。與五玉。後山一扇。分畫爲四。服青質。青緣。前後方龍。補身用素。地邊用雲。襯用深衣。玉色帶。青表。綠裏。綠緣。履用阜綠。結白鞵。

親王妃冠服。受冊助祭朝會服。禮服。洪武三年定。九翟四鳳冠。永樂三年又定。九翟冠制。同皇妃。其大衫霞帔。燕居佩服之飾。同東宮妃。第金事件。減一玉。綬花瑒寶相花文。公主冠服。與親王妃同。惟不用圭。

親王世子冠服。聖節千秋節。并正旦冬至。進賀表箋。及父王生日。諸節慶賀。皆服袞冕。洪武二十六年定。袞冕七章。冕三采。玉珠七旒。圭長九寸。青衣三章。織華蟲。火宗彝。纁裳四章。織藻粉米黼黻。素紗中單。青領襖。赤鞞革帶。佩白玉玄組。綬綬紫質。用三采。紫黃赤織成。間織三白玉環。白鞵赤舄。永樂三年更定。冕冠前後各八旒。每旒五采。纁八就。貫三采玉珠八。赤白青色相次。玉圭長九寸。青衣三章。火在肩。華蟲宗彝在兩袖。皆織成本色。領標襖裾。其纁裳玉佩帶綬之制。俱與親王同。第領織黻文。減二皮弁。用烏紗冒之。前後各八縫。每縫綴三采玉八。餘制如親王。其圭佩帶綬鞵舄。如冕服內制。常服亦與親王同。嘉靖七年定。保和冠服。以燕弁爲準。用八袂去

簪玉。後山以一扇。分畫為四。服與親王同。

世子妃冠服。永樂三年定。與親王妃同。惟冠用七翟。

郡王冠服。永樂三年定。冕冠前後各七旒。每旒五采。纁七就。

貫三采玉珠七。圭長九寸。青衣三章。粉米在肩。藻宗彝在兩

袖。皆織成。纁裳二章。織黼黻各二。中單領織黻文七。餘與親

王世子同。皮弁前後各七縫。每縫綴三采玉七。餘與親王世

子同。其圭佩帶綬鞶舄。如冕服內制。常服亦與親王世子同。

嘉靖七年定。保和冠服。冠用七襖。服與親王世子同。

郡王妃冠服。永樂三年定。冠用七翟。與親王世子妃同。其大

衫霞帔。燕居佩服之飾。俱同。親王妃第繡雲霞翟文。不用盤

鳳文。

郡王長子朝服。七梁冠。大紅素羅衣。白素紗中單。大紅素羅

裳。及蔽膝。大紅素羅白素紗二色。夾帶玉。朝帶丹礬紅花錦

錦雞綬。玉佩象笏。白絹鞵。阜皮雲頭履。鞵。公服阜絢紗幘頭。

大紅素紵絲衣。玉革帶。常服烏紗帽。大紅紵絲。織金獅子。開

袷圓領。玉束帶。阜皮銅線鞵。其保和冠如忠靜之制。用五襖。

服與郡王同。補子用織金方龍。

郡主冠服。永樂三年定。與郡王妃同。惟不用圭。減四珠環一

對。

郡王長子夫人冠服。珠翠五翟冠。大紅紵絲大衫。深青紵絲

金繡翟褙子。青羅金繡翟霞帔。金墜頭。

鎮國將軍冠服。與郡王長子同。鎮國將軍夫人冠服。與郡王

長子夫人同。輔國將軍冠服與鎮國將軍同。惟冠六梁。帶用犀。輔國將軍夫人冠服與鎮國將軍夫人同。惟冠用四翟。抹金銀墜頭。奉國將軍冠服與輔國將軍同。惟冠五梁。帶用金釵花。常服大紅織金虎豹。奉國將軍淑人冠服與輔國將軍夫人同。惟翟子霞帔。金繡孔雀文。鎮國中尉冠服與奉國將軍同。惟冠四梁。帶用素金。佩用藥玉。鎮國中尉恭人冠服與奉國將軍淑人同。輔國中尉冠服與鎮國中尉同。惟冠三梁。帶用銀釵花。綬用盤鵞。公服用深青素羅。常服紅織金熊羆。輔國中尉宜人冠服與鎮國中尉恭人同。惟冠用三翟。翟子霞帔。金繡鴛鴦文。銀墜頭。奉國中尉冠服與輔國中尉同。惟冠二梁。帶用素銀。綬用練鵲。幘頭黑漆。常服紅織金彪。奉國中尉安人冠服與輔國中尉宜人同。惟大衫用丹礬紅。翟子霞帔。金繡練鵲文。

縣主冠服珠翠五翟冠。大紅紵絲。大衫深青紵絲。金繡孔雀。翟子青羅。金繡孔雀。霞帔抹金銀墜頭。郡君冠服與縣主同。惟冠用四翟。翟子霞帔。金繡鴛鴦文。縣君冠服與郡君同。惟冠用三翟。鄉君冠服與縣君同。惟大衫用丹礬紅。翟子霞帔。金繡練鵲文。

明史彙

志第四十八終

明史彙編 輿服 卷之六 輿服二 志第四十九 王鴻緒奉 勅編撰 光祿大夫 經筵講官明史總裁戶部尚書加七級 臣王鴻緒奉 勅編撰 輿服三 文武官冠服 命婦冠服 內外官親屬冠服 內使冠服 侍儀以下冠服 士庶冠服 樂工冠服 軍隸冠服 外蕃冠服 僧道服色 羣臣冠服 洪武元年命制公服朝服以賜百官時禮部言各 官先授散官與見任職事高下不同如御史董希哲前授朝 列大夫澧州知州而任七品職事省司郎中宋冕前授亞中

明史彙

志第四十九

光祿大夫 經筵講官明史總裁戶部尚書加七級 臣王鴻緒奉

勅編撰

輿服三

文武官冠服

命婦冠服

內外官親屬冠服

內使冠服

侍儀以下冠服

士庶冠服

樂工冠服

軍隸冠服

外蕃冠服

僧道服色

羣臣冠服 洪武元年命制公服朝服以賜百官時禮部言各 官先授散官與見任職事高下不同如御史董希哲前授朝 列大夫澧州知州而任七品職事省司郎中宋冕前授亞中

大夫黃州知府。而任五品職事。散官與見任之職不同。故服色不能無異。乞定其制。乃詔省部臣定議。禮部復言。唐制。服色皆以散官爲準。元制。散官職事各從其高者。服色因之。國初。服色依散官。與唐制同。乃定服色準散官。不計見職。於是所賜袍帶亦竝如之。三年。禮部言。歷代異尚。夏黑商白。周赤。秦黑漢赤。唐服飾黃。旗幟赤。今國家承元之後。取法周漢。唐宋服色所尚。於赤爲宜。從之。

文武官朝服。洪武二十六年定。凡大祀慶成。正旦冬至聖節。及頒詔開讀。進表傳制。俱用梁冠赤羅衣。白紗中單。青飾領。緣赤羅裳。青緣赤羅蔽膝。大帶赤白二色絹。革帶佩綬。白鞵。黑履。一品至九品。以冠上梁數爲差。公冠八梁。加籠巾貂蟬。

立筆五折。四柱香草五段。前後玉蟬。侯七梁。籠巾貂蟬。立筆四折。四柱香草四段。前後金蟬。伯七梁。籠巾貂蟬。立筆二折。四柱香草二段。前後玳瑁蟬。俱插雉尾。駙馬與侯同。不用雉尾。一品冠七梁。不用籠巾貂蟬。革帶與佩俱玉。綬用黃綠赤。紫。織成雲鳳四色花錦。下結青絲網玉綬環二。二品六梁。革帶綬環犀。餘同一品。三品五梁。革帶金。佩玉。綬用黃綠赤。紫。織成雲鶴花錦。下結青絲網金綬環二。四品四梁。革帶金。佩藥玉。餘同三品。五品三梁。革帶銀。鈹花。佩藥玉。綬用黃綠赤。紫。織成盤鵬花錦。下結青絲網銀鍍金綬環二。一品至五品。笏俱象牙。六品七品二梁。革帶銀。佩藥玉。綬用黃綠赤。織成練鵲三色花錦。下結青絲網銀綬環二。獨御史服獬廌。八品

九品一梁革帶烏角。佩藥玉。綬用黃綠。織成鷓鴣二色花錦。下結青絲網銅綬環二。六品至九品。笏俱槐木。其武官應直守衛者。別有服色。雜職未入流品者。大朝賀進表行禮。止用公服。三十年。令視九品官用朝服。嘉靖八年。更定朝服之制。梁冠如舊式。上衣赤羅青緣。長過腰。指七寸。毋掩下裳。中單白紗。青緣。下裳七幅。前三後四。每幅三襞。積赤羅青緣蔽膝。綴革帶。綬各從品級花樣。革帶之後。佩綬繫而掩之。其環亦各從品級。用玉犀金銀銅。不以織於綬。大帶表裏俱素。惟兩耳及下垂緣。又以青組約之。革帶俱如舊式。珮玉一如詩傳之制。去雙滴及二珩。其三品以上玉。四品以下藥玉。及鞮履。俱如舊式。萬曆五年。令百官正旦朝賀。毋僭躡朱履。故事。

十一月。百官戴煖耳。是年朝覲外官。及舉人監生。不許戴煖耳入朝。

凡親祀郊廟社稷。文武官分獻陪祀。則服祭服。洪武二十六年定。一品至九品。青羅衣白紗中單。俱阜領緣赤羅裳。阜緣赤羅蔽膝。方心曲領。其冠帶佩綬等差。竝同朝服。又定品官家用祭服。三品以上。去方心曲領。四品以下。并去珮綬。嘉靖八年。更定百官祭服。上衣青羅阜緣。與朝服同。下裳赤羅阜緣。與朝服同。蔽膝綬環。大帶革帶。佩玉鞮履。俱與朝服同。其視牲朝日夕月耕藉。祭歷代帝王。獨錦衣衛堂上官。大紅蟒衣。飛魚烏紗帽。鸞帶。佩繡春刀。祭太廟社稷。則大紅便服。文武官公服。洪武二十六年定。每日早晚朝奏事。及侍班謝。

恩見辭則服之。在外文武官。每日公座服之。其制盤領右衽。袍用紵絲或紗羅絹。袖寬三尺。一品至四品緋袍。五品至七品青袍。八品九品綠袍。未入流雜職官。袍笏帶與八品以下同。公服花樣。一品大獨科花徑五寸。二品小獨科花徑三寸。三品散答花無枝葉徑二寸。四品五品小雜花紋徑一寸五分。六品七品小雜花徑一寸。八品以下無紋。幘頭漆紗二等。展角長一尺二寸。雜職官幘頭垂帶。後復令展角不用垂帶。與入流官同。笏依朝服爲之。腰帶。一品玉或花或素。二品犀。三品四品金荔枝。五品以下烏角。鞋用青革。仍垂撻尾於下。鞞用皂。其後常朝止便服。惟朔望具公服朝參。凡武官應直守衛者。別有服色。不拘此制。公侯駙馬伯服色花樣。腰帶與

一品同。文武官花樣。如無從織造則用素。百官入朝。雨雪許服雨衣。奉天華蓋武英諸殿奏事。必躡履鞢。違者御史糾之。萬曆五年令。常朝俱衣本等錦繡服色。其朝覲官見辭謝恩。不論已未入流。公服行禮。

文武官常服。洪武三年定。凡常朝視事。以烏紗帽團領衫。束帶爲公服。其帶。一品玉。二品花犀。三品金鈸花。四品素金。五品銀鈸花。六品七品素銀。八品九品烏角。凡致仕及侍親辭閑官。紗帽束帶。爲事黜降者。服與庶人同。至二十四年。又定公侯駙馬伯束帶。與一品同。雜職官與八品九品同。朝官常服禮鞢。洪武六年定。先是百官入朝。遇雨皆躡釘鞞。聲徹殿陛。侍儀司請禁之。太祖曰。古者入朝有履。自唐始用鞞。其令

朝官爲輓底皮鞵。冒於鞞外。出朝則釋之。禮部言。官民奢侈。越制。詔申禁之。仍參酌漢唐之制。頒行遵守。凡職官一品二品。用雜色文綺綾羅。帽頂用金。帽珠除玉外。隨所用。六品至九品。用雜色文綺綾羅。帽頂用銀。帽珠瑪瑙水晶。香木。一品至六品。穿四爪龍。以金繡爲之者。聽。禮部又議。品官見尊長。用朝君公服。於理未安。宜別製梁冠絳衣絳裳革帶。大帶。大白鞵。烏烏佩綬。其衣裳去緣襖。三品以上佩綬。三品以下不用。從之。二十二年。令文武官遇雨。戴雨帽。公差出外。戴帽子。入城不許。二十三年。定制。文官衣自領至裔。去地一寸。袖長過手。復回至肘。公侯駙馬。與文官同。武官去地五寸。袖長過手七寸。

二十四年。定公侯駙馬伯服。繡麒麟。白澤。文官一品仙鶴。二品錦鷄。三品孔雀。四品雲雁。五品白鵬。六品鷺鷥。七品鴻鴈。八品黃鸝。九品鶴鶉。雜職練鵲。風憲官獬廌。武官一品二品獅子。三品四品虎豹。五品熊羆。六品七品彪。八品犀牛。九品海馬。又令品官常服用雜色紵絲綾羅綵繡。官吏衣服帳幔。不許用玄黃紫三色。并織繡龍鳳文。違者罪及染造之人。朝見人員。四時並用色衣。不許純素。三十年。令致仕官服色。與見任同。若朝賀謝恩。見辭一體具服。景泰四年。令錦衣衛指揮侍衛者。得衣麒麟。天順二年。定官民衣服。不得用蟒龍飛魚斗牛大鵬。像生獅子四寶相花。大西番蓮。大雲花樣。并玄黃紫。及玄色黑綠柳黃薑黃明黃諸色。弘治十三年。奏定。公

侯伯文武大臣及鎮守守備違例奏請蟒衣飛魚衣服者。科道糾劾。治以重罪。正德十一年。設東西兩官廳。將士悉衣黃單甲。中外化之。金緋盛服者。亦必加此於上。都督江彬等。承日紅笠之上。綴以靛染天鷲翎。以爲貴飾。貴者飄三英。次者二英。兵部尚書王瓊得賜一英冠。以下教場。自謂殊遇。其後巡狩所經。督餉侍郎。巡撫都御史。無不衣單甲。見上者。十三年。車駕還京。傳旨俾迎候者。用曳撒。大帽。鸞帶。尋賜羣臣大紅紵絲羅紗各一。其服色。一品斗牛。二品飛魚。三品蟒。四品麒麟。六七品虎彪。翰林科道不限品級。皆與焉。惟部曹五品下不與。時文臣服色。亦以走獸而麒麟之服。逮於四品。尤異事也。十八年。世宗登極。詔云。近來冒濫玉帶蟒龍飛魚斗牛

服色。皆庶官雜流。并各處將領。夤緣奏乞。今俱不許。武職卑官。僭用公侯服色者。亦禁絕之。嘉靖六年。復禁中外官。不許濫服五彩裝花。織造違禁顏色。七年。既定燕居法服之制。閣臣張璁因言。品官燕居之服。未有明制。詭異之徒。競爲奇服。以亂典章。乞更法古。立端別爲簡易之制。昭布天下。使貴賤有等。帝因復製忠靜冠服圖。頒禮部勅諭之曰。祖宗稽古定制。品官朝祭之服。各有等差。第常人之情。多謹於明顯。怠於幽獨。古聖王慎之。制立端以爲燕居之服。比來衣服詭異。上下無辨。民志何由定。朕因酌古立端之制。更名忠靜。庶幾乎進思盡忠。退思補過焉。朕已著爲圖說。如式製造。在京許七品以上官。及八品以上翰林院國子監行人司。在外許方面

官及各府堂官。州縣正堂。儒學教官服之。武官止都督以上。其餘不許濫服。禮部以圖說頒布天下。如勅奉行。按忠靜冠。仿古玄冠。冠匡如制。以烏紗冒之。兩山俱列於後。冠頂仍方。中微起三梁。各壓以金線。邊以金線之。四品以下去金線。以淺色絲線。忠靜服。仿古玄端。服色用深青。以紵絲紗羅爲之。三品以上雲。四品以下素。緣以藍青。前後飾本等花樣。補子深衣。用玉色素帶。如古大夫之帶制。青表綠緣。邊并裏素履。青綠條結白鞵。十六年。羣臣朝於駐蹕所。兵部尚書張瓚服蟒。帝怒。諭閣臣夏言曰。尚書二品。何自服蟒。言對曰。瓚所服。乃欽賜飛魚服。鮮明類蟒耳。帝曰。飛魚何組。兩角。其嚴禁之。於是禮部奏定。文武官不許擅用蟒衣飛魚斗牛。違禁華異。

服色。其大紅紵絲紗羅服。惟四品以上官。及在京五品堂上官。經筵講官許服。五品官及經筵不爲講官者。俱服青綠錦繡。遇吉禮止衣紅布絨褐。品官花樣。竝依品級。錦衣衛指揮侍衛者。仍得衣麒麟。其帶俸非侍衛。及千百戶。雖侍衛。不許僭用。

歷朝賜服文臣。有未至一品。而賜玉帶者。自洪武中學士羅復仁始。衍聖公秩正二品。服織金麒麟袍。玉帶。則景泰中。入朝拜賜。自是以爲常。內閣賜蟒衣。自弘治中。劉健。李東陽始。麒麟本公侯服。而內閣服之。則嘉靖中。嚴嵩。徐階。皆受賜也。仙鶴文臣。一品服也。嘉靖中。成國公朱希忠。都督陸炳服之。皆以玄壇供事。而學士嚴訥。李春芳。董份。以五品撰青詞。亦

賜仙鶴。尋諭供事壇中。乃用。於是尚書皆不敢衣鶴。後勅南京織閃黃補麒麟仙鶴。賜嚴嵩閃黃。乃上用服色也。又賜徐階教子升天蟒。萬曆中。賜張居正坐蟒。武清侯李偉以太后父亦受賜。

儀賓朝服。公服常服。俱視品級。與文武官同。惟笏皆象牙。常服花樣。視武官。弘治十三年。定郡主儀賓。釵花金帶。胸背獅子。縣主儀賓。釵花金帶。郡君儀賓。光素金帶。胷背俱虎豹。縣君儀賓。釵花銀帶。鄉君儀賓。光素銀帶。胸背俱彪。有僭用者。革去冠帶。戴平頭巾。於儒學讀書習禮三年。

狀元及諸進士冠服。狀元冠二梁。緋羅圓領。白絹中單。錦綬蔽膝。紗帽。槐木笏。光銀帶。藥玉佩。朝鞞。氈鞵。皆御前頒賜。上表謝恩。日服之。進士巾如烏紗帽。頂微平。展角濶寸餘。長五寸許。系以垂帶。阜紗爲之。深藍羅袍。緣以青羅。袖廣而不殺。槐木笏。革帶青鞵。飾以黑角。垂撻尾於後。廷試後。頒於國子監。傳臚日服之。上表謝恩後。謁先師行釋菜禮畢。始易常服。其中袍仍送國子監藏之。

命婦冠服。洪武元年定。命婦一品冠。花釵九樹。兩博鬢九鈿。服用翟衣。繡翟九重。素紗中單。黼領。朱縠標。襖裾。蔽膝。隨裳色。以緞爲領。緣加文繡。重翟爲章。二等。玉帶青鞵。烏佩。綬。二品冠。花釵八樹。兩博鬢八鈿。服用翟衣。八等犀帶。餘如一品。三品冠。花釵七樹。兩博鬢七鈿。翟衣七等金革帶。餘如二品。四品冠。花釵六樹。兩博鬢六鈿。翟衣六等金革帶。餘如三品。


五品冠。花釵五樹。兩博髮。五鈿。翟衣五等。烏角帶。餘如四品。
六品冠。花釵四樹。兩博髮。四鈿。翟衣四等。烏角帶。餘如五品。
七品冠。花釵三樹。兩博髮。三鈿。翟衣三等。烏角帶。餘如六品。
自一品至五品。衣色隨夫用紫。六品七品。衣色隨夫用緋。其
大帶如衣色。四年。以古天子諸侯服。袞冕。后與夫人。禕翟。今
羣臣既以梁冠絳衣爲朝服。不敢用冕。則外命婦亦不當服
翟衣以朝。命禮部議之。奏定。命婦以山松特髻。假髮。花鈿。真
紅大袖衣。珠翠。蹙金霞帔爲朝服。以朱翠角冠。金珠花釵。潤
袖。雜色綠緣爲燕居之服。一品衣。金繡文霞帔。金珠翠。妝飾
玉墜子。二品衣。金繡雲肩。大雜花霞帔。金珠翠。妝飾金墜子。
三品衣。金繡大雜花霞帔。珠翠。妝飾金墜子。四品衣。繡小雜

花霞帔。翠。妝飾金墜子。五品衣。銷金大雜花霞帔。生色畫絹
起花。妝飾金墜子。六品衣。銷金小雜花霞帔。生色畫絹
起花。妝飾鍍金銀墜子。八品九品衣。大紅素羅霞帔。生色畫
絹。妝飾銀墜子。首飾。一品二品。金玉珠翠。三品四品。金珠翠。
五品。金翠。六品以下。金鍍銀間用珠。五年定。命婦團衫之制。
以紅羅爲之。繡重雉爲等第。一品九等。二品八等。三品七等。
四品六等。五品五等。六品四等。七品三等。其餘不用繡雉。二
十四年定制。命婦朝見君后。在家見舅姑并夫。及祭祀。則服
禮服。公侯伯夫人。與一品同。大袖衫。真紅色。一品至五品。紵
絲綾羅。六品至九品。綾羅紬絹霞帔。褶子。皆深青段。公侯及
一品二品。金繡雲霞翟文。三品四品。金繡雲霞孔雀文。五品

繡雲霞鴛鴦文六品七品繡雲霞纓韻文大袖衫領濶三寸兩領直下一尺間綴紐子三末綴紐子二紐在掩紐之下拜則放之霞帔二條各繡禽七隨品級用前四後三墜子中鈿花禽一四面雲霞文禽如霞帔隨品級用笏以象牙爲之二十六年定一品冠用金事件珠翟五珠牡丹開頭二珠半開二翠雲二十四片翠牡丹葉一十八片翠口圈一副上帶金寶鈿花八金翟二口銜珠結二二品至四品冠用金事件珠翟四珠牡丹開頭二珠半開四翠雲二十四片翠牡丹葉一十八片翠口圈一副上帶金寶鈿花八金翟二口銜珠結二一品二品霞帔褙子俱雲霞翟文鈿花金墜子三品四品霞帔褙子俱雲霞孔雀文鈿花金墜子五品六品冠用抹金銀


事件珠擢三珠牡丹開頭二珠半開五翠雲二十四片翠牡丹葉一十八片翠口圈一副上帶抹金銀寶鈿花八抹金銀翟二口銜珠結子二五品霞帔褙子俱雲霞鴛鴦文鍍金鈿花銀墜子六品霞帔褙子俱雲霞練鵲文鈿花銀墜子七品至九品冠用抹金銀事件珠翟二珠月桂開頭二珠半開六翠雲二十四片翠月桂葉一十八片翠口圈一副上帶抹金銀寶鈿花八抹金銀翟二口銜珠結子二七品霞帔墜子褙子與六品同八品九品霞帔用繡纏枝花墜子與七品同褙子繡摘枝團花

內外官親屬冠服洪武元年禮部尚書崔亮奉詔議定內外官父兄伯叔子孫弟姪用烏紗帽軟脚垂帶圓領衣烏角帶



品官祖母及母。與子孫同居親弟姪婦女。禮服合以本官所居官職品級。通用漆紗珠翠慶雲冠。本品衫霞帔褙子。緣襖襖裙。惟山松特髻子。止許受封誥勅者用之。品官次妻。許用本品珠翠慶雲冠褙子為禮服。銷金潤領長襖長裙為常服。二十五年令文武官父兄伯叔弟姪子壻。皆許穿鞞。內使冠服。明初置內使監。冠烏紗描金曲脚帽。衣胸背花盤領窄袖衫。角帶鞞。用紅扇面黑下椿。各官火者服。與庶人同。洪武三年。諭宰臣。內使監未有職名者。當別製冠以別監官。禮部奏定。內使監。凡遇朝會。依品具朝服。公服行禮。其常服。葵花胸背團領衫。不拘顏色。烏紗帽。犀角帶。無品從者。常服團領衫。無胸背花。不拘顏色。烏角帶。烏紗帽。垂軟帶。年十五

以下者。惟戴烏紗小頂帽。按大政記。永樂以後。宦官在帝左右。必蟒服。製如曳撒。繡蟒於左右。繫以鸞帶。此燕閑之服也。次則飛魚。惟入侍用之。貴而用事者。賜蟒。文武一品官。所不易得也。單蟒面皆斜向。坐蟒則面正向。尤貴。又有膝襪者。亦如曳撒。上有蟒補。當膝處。橫織細雲蟒。蓋南郊及山陵。扈從便於乘馬也。或召對燕見。君臣皆不用袍。而用此。第蟒有五爪四爪之分。襪有紅黃之別耳。弘治元年。都御史邊鏞言。國朝品官無蟒衣之制。夫蟒無角無足。今內官多乞蟒衣。殊類龍形。非制也。乃下詔禁之。十七年。諭閣臣劉健曰。內臣僭妄尤多。因言服色所宜禁。曰。蟒龍飛魚斗牛。本在所禁。不合私織。間有賜者。或久而敝。不宜輒自織。用玄黃紫皂。乃屬正禁。



卽柳黃明黃薑黃諸色亦應禁之。孝宗加意鉗束。故申飭者再然。內官驕恣已久。積習相沿。不能止也。初太祖制內臣服。其紗帽與羣臣異。且無朝冠幘頭。亦無祭服。萬曆初。穆宗主入太廟。大瑞冠進賢服祭服。以從。蓋內府祀中霤竈井之神。例遣中官。因自創爲祭服。非由廷議也。

侍儀舍人冠服。洪武二年。禮官議定。侍儀舍人。導禮依元制。展脚幘頭。窄袖紫衫。塗金束帶。皁紋鞞。常服烏紗唐帽。諸色盤領衫。烏角束帶。衫不用黃。四年。中書省議定。侍儀舍人。併御史臺。知班引禮執事。冠進賢冠。無梁服。絳色衣。其蔽膝履鞞帶。笏與九品同。惟不用中單。

校尉冠服。洪武三年定制。執仗之士。首服皆縷金額。交脚幘頭。其服有諸色。辟邪寶相花。裙襖銅葵花。束帶皁紋鞞。六年。令校尉衣只孫束帶。幘頭鞞鞞。只孫一作質孫。本元制。蓋一色衣也。十四年。改用金鷲帽。黑漆餞。金荔枝銅釘樣。每五釘攢就。四面稍起。邊欄靛青緊束之。二十二年。令將軍力士。校尉旗軍。常戴頭巾。或榼腦。二十五年。令校尉力士。上直穿鞞。出外不許。

刻期冠服。宋置快行親從官。明初謂之刻期冠。方頂巾。衣胸背鷹鷄花。腰線襖子。諸色濶絲匾條。大象牙雕花環。行膝八帶鞞。洪武六年。惟用雕刻象牙條環。餘同庶民。

儒士生員監生巾服。洪武三年。令士人戴四方平定巾。二十三年。定儒士生員衣。自領至裳。去地一寸。袖長過手。復回不

及肘三寸。二十四年。以士子巾服無異吏胥。宜甄別之。命工部制式以進。太祖親視。凡三易。乃命制生員襴衫。用玉色布。絹爲之。寬袖。阜緣。阜條。軟巾。垂帶。貢舉入監者。不變所服。洪武末。許戴遮陽帽。後遂私帶之。洪熙中。帝問衣藍衣者何人。左右以監生對。帝曰。著青衣較好。乃易青圓領。嘉靖二十二年。禮部言。士子冠服詭異。有凌雲等巾。甚乖禮制。詔所司禁之。萬曆二年。禁舉人監生儒僭用忠靜冠巾。錦綺鑲履。及張繖蓋。戴煖耳。違者五城御史送問。

庶人冠服。明初庶人婚。許假九品服。洪武三年。庶人初戴四角巾。改四方平定巾。雜色盤領衣。不許用黃。又令男女衣服。不得僭用金繡錦綺紵絲綾羅。止許紬絹素紗。其鞞不得裁

製花樣。金線裝飾。首飾釵鐲。不許用金玉珠翠。止用銀。六年。令庶人巾環。不得用金玉瑪瑙珊瑚琥珀。未入流品者同。庶人帽。不得用頂帽珠。止許水晶香木。十四年。令農衣紬紗絹布。商賈止衣絹布。農家有一人爲商賈者。亦不得衣紬紗。二十二年。令農夫戴斗笠蒲笠。出入市井不禁。不親農業者。不許。二十三年。令耆民衣制。袖長過手。復回不及肘三寸。庶人衣長去地五寸。袖長過手六寸。袖椿廣一尺。袖口五寸。二十五年。民間製鞞。巧裁花樣。嵌以金線藍條。詔禮部嚴禁。庶人不穿鞞。止許皮扎鞞。惟北地苦寒。許用牛皮直縫鞞。正德元年。禁商販僕役倡優下賤。不許服用貂裘。十六年。禁軍民衣紫花罩甲。或禁門或四外遊走者。緝事人擒之。

士庶妻冠服。洪武三年定制。士庶妻首飾。用銀鍍金。耳環用金珠。釧鐲用銀。服淺色團衫。用紵絲綾羅紬絹。五年令。民間婦人禮服。惟紫絕不用金繡。袍衫止紫綠桃紅。及諸淺淡顏色。不許用大紅鴉青黃色。帶用藍絹布。女子在室者。作三小髻。金釵珠頭髻。窄袖褶子。凡婢使。高頂髻。絹布狹領。長襖長裙。小婢使。雙髻。長袖短衣。長裙。成化十年。禁官民婦女。不得僭用渾金衣服。寶石首飾。正德元年令。軍民婦女。不許用銷金衣服。帳幔。寶石首飾。鐲釧。

協律郎樂舞生冠服。明初郊社宗廟用雅樂。協律郎幘頭紫羅袍。荔枝帶。樂生緋袍。展脚幘頭。舞士幘頭紅羅袍。荔枝帶。阜韠。文舞生紅袍。武舞生緋袍。俱展脚幘頭。革帶。阜韠。朝會

大樂九奏。歌工中華一統巾。紅羅生色大袖衫。畫黃鶯鸚鵡花樣。紅生絹襯衫。錦領。杏紅絹裙。白絹大口袴。青絲條。白絹鞞。茶褐鞞。其和聲郎押樂者。阜羅濶帶巾。青羅大袖衫。紅生絹襯衫。錦領。塗金束帶。阜韠。其三舞。一武舞。曰平定天下之舞。舞士皆黃金束髮冠。紫絲纓。青羅生色。畫舞鶴花樣。窄袖衫。白生絹襯衫。錦領。紅羅銷金大袖單袍。紅羅銷金裙。阜生色。畫花緣襖。白羅銷金汗袴。藍青羅銷金緣。紅絹擁項。紅結子。紅絹束腰。塗金束帶。青絲大條。錦臂鞞。綠雲頭。阜韠。舞師黃金束髮冠。紫絲纓。青羅大袖衫。白絹襯衫。錦領。塗金束帶。綠雲頭。阜韠。一文舞。曰車書會同之舞。舞士皆黑光描金方山冠。青絲纓。青紅羅大袖衫。紅生絹襯衫。錦領。紅羅擁項。紅

結子塗金束帶。白絹大口袴。白絹鞞。茶褐鞵。舞師冠服。與舞士同。惟大袖衫青。不用紅羅。擁項紅結子。一文舞。曰撫安。四夷之舞。舞士東夷四人。椎髻。於後繫紅銷金頭繩。紅羅銷金帔額。中綴塗金博山。兩傍綴塗金巾環。明金耳環。青羅生色畫花大袖衫。紅生色領袖。紅羅銷金裙。青銷金裙緣。紅生絹襯衫。錦領塗金束帶。烏皮鞞。西戎四人。間道錦纏頭。明金耳環。紅紵絲細摺襖子。大紅羅生色雲肩。綠生色緣。藍青羅銷金汗袴。紅銷金緣。繫腰合鉢。十字泥金數珠五色。銷金羅香囊。紅絹擁項紅結子。赤皮鞞。南蠻四人。縮朝天髻。繫紅羅生色銀錠。紅銷金帔額。明金耳環。紅織金短襖子。綠織金細摺短裙。絨錦袴。間道紵絲手巾。泥金頂牌。金珠瓔珞。綴小金鈴。

錦行纏泥金獅蠻帶。綠銷金擁項紅結子。赤皮鞞。北翟四人。戴單于冠。貂鼠皮簷。雙垂髻。紅銷金頭繩。紅羅銷金帔額。諸色細摺襖子。藍青生色雲肩。紅結子。紅銷金汗袴。繫腰合鉢。阜皮鞞。其舞師皆戴白捲簷氈帽。塗金帽頂。一撒紅纓。紫羅帽。紅綠金繡襖子。白銷金汗袴。藍青銷金緣。塗金束帶。綠擁項紅結子。赤皮鞞。凡大樂工。及文武二舞樂工。皆曲脚。幘頭。紅羅生色畫花大袖衫。塗金束帶。紅絹擁項紅結子。阜皮鞞。四夷樂工。皆蓮花帽。諸色細摺襖子。白銷金汗袴。紅銷金緣。紅綠絹束腰。紅羅擁項紅結子。花鞞。永樂間。定殿內。侑食樂。奏平定天下之舞。引舞樂工。皆青羅包巾。青紅綠玉色羅。銷金胸背襖子。渾金銅帶。紅羅袴。裊雲頭阜鞞。青綠羅銷金。

包臀。舞人服色如之。奏撫安四夷之舞。高麗舞四人。皆笠子。青羅銷金胸背襖子。銅帶。皐鞞。琉球舞四人。皆棉布花手巾。青羅大袖襖子。銅帶。白碾光絹間道。踢袴。皐皮鞞。北番舞四人。皆狐帽。青紅紵絲。銷金襖子。銅帶。伍魯速。回回舞四人。皆青羅帽。比里罕。棉布花手巾。銅帶。皐鞞。奏車書會同之舞。舞人皆皐羅頭巾。青綠玉色。皐沿邊襪。茶褐線條。皐皮四縫鞞。奏表正萬邦之舞。引舞二人。青羅包巾。紅羅銷金項帕。紅生絹錦領中單。紅生絹銷金通袖襖子。青綠條銅帶。織錦臂鞞。雲頭皐鞞。各色銷金包臀。紅絹裕褷。舞人樂工。服色與引舞同。奏天命有德之舞。引舞二人。青蒙紗如意冠。紅生絹錦領中單。紅生絹大袖袍。各色絹采畫直纏。黑角偏帶。藍絹綵雲

頭。皐鞞。白布鞞。舞人樂工。服色與引舞同。嘉靖九年定文武舞生服制。園丘服。青紵絲。方澤服。黑綠紗。朝日壇服。赤羅。夕月壇服。玉色羅。

宮中女樂冠服。洪武三年定制。凡中宮供奉女樂。奉鑾等官妻。本色髮髻。青羅圓領。提調女樂。黑漆唐巾。大紅羅銷金花圓領。鍍金花帶。皐鞞。歌章女樂。黑漆唐巾。大紅羅銷金裙襖。胸帶。大紅羅帙額。青綠羅彩畫雲肩。描金牡丹花。皐鞞。奏樂女樂。服色與歌章同。嘉靖九年。祀先蠶。定樂女生冠服。黑縐紗。描金蟬冠。黑絲縷。黑素羅。銷金葵花胸背。大袖女袍。黑生絹襖衫。錦領。塗金束帶。白鞞。黑鞞。

教坊司冠服。洪武三年定。教坊司樂藝。青巾字頂巾。繫紅綠

裙襖。樂妓明角冠。阜褙子。不許與民妻同。御前供奉。併長鼓吹冠。紅羅胸背小袖袍。紅絹裙襖。阜褙。色長鼓吹冠。紅青綠紵絲彩畫百花袍。紅絹裙襖。歌工弁冠。紅羅織金胸背大袖袍。紅生絹錦領。中單黑角帶。紅熟絹錦脚袴。阜皮琴鞵。白綿布夾鞵。樂工服色。與歌工同。凡教坊司官。常服冠帶。與百官同。至御前供奉。執粉漆笏。服黑漆幘頭。黑綠羅大袖襪袍。黑角偏帶。阜褙。教坊司伶人。常服綠色巾。以別士庶之服。樂人皆戴鼓吹冠。不用錦條。惟紅裙襖。服色不拘紅綠。教坊司婦人。不許戴冠。穿褙子。樂人衣服。止用明綠。桃紅。玉色。水紅。茶褐色。併色長樂工。俱阜頭巾。雜色條。

王府樂工冠服。洪武十五年定。凡朝賀用大樂。宴禮七奏樂。

樂工俱紅絹彩畫。胸背方花小袖單袍。有花鼓吹冠。錦臂鞵。阜褙。幘額以紅羅彩畫。束腰以紅絹。其餘樂工。用綠絹彩畫。胸背方花小袖單袍。無花鼓吹冠。幘額以紅絹彩畫。束腰以紅絹。

軍士服。洪武元年令。製衣表裏異色。謂之鴛鴦戰襖。以新軍號。二十一年定。旗手衛軍士力士。俱紅裋襖。其餘衛所裋襖。如之。凡裋襖長齊膝。窄袖。內實以棉花。二十六年令。騎士服。對襟衣。便於乘馬也。不應服而服者罪之。

阜隸公人冠服。洪武三年定。阜隸圓頂巾。阜衣。四年定。阜隸公使人。阜盤領衫。平頂巾。白裙襖。帶錫牌。十四年令。各衙門。祇禁原服。阜衣。改用淡青。二十五年。阜隸伴當。不許著鞵。止。

用皮扎鞞。

外國君臣冠服。洪武二年。高麗入朝。請祭服制度。命製給之。二十七年。定蕃國朝貢儀。國王來朝。如嘗賜朝服者。服之以朝。三十一年。賜琉球國王。併其臣下冠服。永樂中。賜琉球中山王。皮弁玉圭。麟袍犀帶。視二品秩。宣德三年。朝鮮國王李禔言。洪武中。蒙賜國王冕服九章。陪臣冠服。比朝廷遞降二等。故陪臣一等。比朝臣第三等。得五梁冠服。永樂初。先臣芳遠。遣世子禔入朝。蒙賜五梁冠服。臣竊惟世子冠服。何止同陪臣一等。乞為定制。乃命製六梁冠。賜之。嘉靖六年。令外國朝貢人。不許擅用違制衣服。如違賣者。買者同罪。僧道服。洪武十四年。定禪僧茶褐常服。青條玉色袈裟。講僧

玉色常服。綠條淺紅袈裟。教僧阜常服。黑條淺紅袈裟。僧官如之。惟僧錄司官。袈裟綠文及環。皆飾以金。道士常服青。法服朝衣皆赤。道官亦如之。惟道錄司官。法服朝服。綠文飾金。凡在京道官。紅道衣。金襴木簡。在外道官。紅道衣。木簡。不用金襴。道士青道服。木簡。

明史藁

志第四十九終

明史彙
光祿大夫 經筵講官明史總裁戶部尚書加七級 王鴻緒奉
敕編撰
輿服四
皇帝寶璽 皇后冊寶 皇妃以下冊印
皇太子冊寶 皇太子妃冊寶
親王以下冊寶冊印 鐵券
符牌 印信 宮室制度
臣庶室屋制度
明初寶璽十七。其大者曰皇帝奉天之寶。曰皇帝之寶。曰皇
帝行寶。曰皇帝信寶。曰天子之寶。曰天子行寶。曰天子信寶。

明史彙

志第五十

光祿大夫 經筵講官明史總裁戶部尚書加七級 王鴻緒奉
敕編撰

輿服四

皇帝寶璽 皇后冊寶 皇妃以下冊印

皇太子冊寶 皇太子妃冊寶

親王以下冊寶冊印 鐵券

符牌 印信 宮室制度

臣庶室屋制度

明初寶璽十七。其大者曰皇帝奉天之寶。曰皇帝之寶。曰皇
帝行寶。曰皇帝信寶。曰天子之寶。曰天子行寶。曰天子信寶。

曰制誥之寶。曰勅命之寶。曰廣運之寶。曰皇帝尊親之寶。曰皇帝親親之寶。曰敬天勤民之寶。又有御前之寶。表章經史之寶。及欽文之璽。丹符出驗四方。洪武元年。欲製寶璽。有賈胡浮海。獻美玉。曰此出于闐。祖父相傳。當爲帝王寶璽。乃命製爲寶。不知十七寶中。此玉製何寶也。成祖又製皇帝親親之寶。皇帝奉天之寶。誥命之寶。勅命之寶。弘治十二年。鄆縣民毛志學。於泥河濱得玉璽。其文曰受命于天。既壽永昌。色白微青。螭紐。陝西巡撫熊翀。以爲秦璽復出。遣人獻之。禮部尚書傅瀚言。自有秦璽以來。歷代得喪真僞之跡。具載史籍。今所進篆文。與輟耕錄等書摹載魚鳥篆文不同。其螭紐。又與史傳所紀文盤五龍螭缺一角。有刻魏錄者不類。蓋秦璽

亡已久。今所進與宋元所得。疑皆後世摹秦璽而刻之者。竊惟璽之用。以識文書防詐僞。非以爲寶玩也。自秦始皇得藍田玉。以爲璽。漢以後傳用之。自是巧爭力取。謂得此乃足以受命。而不知受命以德。不以璽也。故求之不得。則僞造以欺人。得之則君臣色喜。以誇示於天下。是皆貽笑千載。我高皇帝。自制一代之璽。文各有義。隨事而施。真足以爲一代受命之符。而垂法萬世。何藉此璽哉。帝從其言。却而不用。嘉靖十八年。新製七寶。曰奉天承運。大明天子寶。大明受命之寶。巡狩天下之寶。垂訓之寶。命德之寶。討罪安民之寶。勅正萬民之寶。與國初寶璽。共爲御寶二十四。尚寶司官掌之。皇后之冊。用金冊二片。長一尺二寸。廣五寸。鐫以真書。上下

有孔。聯以紅縵。開闔如書帙。藉以紅錦褥。冊蓋飾以渾金。瀝粉蟠龍。以紅羅銷金袱包之。臨冊之日。置於紅髹輿案。案頂有紅羅瀝水。用檐牀二舉之。凡皇后寶壘。皆司寶女官所司。掌寶典寶佐之。初制金寶龜紐。篆書曰皇后之寶。方五寸九分。厚一寸七分。寶池用金。外篋用木。飾以渾金瀝粉蟠龍。中篋用金。鈹蟠龍。內小篋飾如外篋。內置寶座。雕蟠龍。飾以渾金。座上用錦褥。置寶及寶池。

皇貴妃而下。有冊無寶而有印。妃冊用鍍金銀冊二片。廣長與后冊同。冊蓋飾以渾金瀝粉蟠鳳。其印用金龜紐。文曰皇妃之印。篋飾以蟠鳳。宣德元年。帝以貴妃孫氏有容德。特請於皇太后。製金寶賜之。未幾卽誕皇嗣。自是貴妃授寶。遂爲

故事。嘉靖十年。立九嬪。冊用銀。殺皇妃五分之一。以金飾之。皇太子冊寶。冊用金二片。其制及蓋篋之飾。與皇后冊同。寶用龜紐。篆書皇太子寶。其制及池篋之飾。與皇后寶同。

皇太子妃冊寶。其冊用金兩葉。重百兩。每葉高一尺二寸。廣五寸。藉冊以錦。聯冊以紅絲條。墊冊以錦褥。裏冊以紅羅銷金袱。其蓋飾以渾金瀝粉雲鳳。內有花銀釘。鉸嵌金絲鐵筥。簾外以紅羅銷金袱覆之。其金寶之制未詳。

親王冊寶。冊制與皇太子同。其寶用金龜紐。方五寸二分。厚一寸五分。文曰某王之寶。池篋之飾。與皇太子寶同。寶蓋之飾。則雕蟠螭。

親王妃冊印。其金冊高視太子妃。冊減一寸。餘制悉同。冊文

視親王。其金印方寸龜紐。

公主冊印。銀冊二片。鐫字鍍金。字則依數分行。上下有孔。聯以紅條。開闔如書帙。藉以紅錦褥。冊蓋飾以渾金瀝粉蟠螭。其印同宋制。用金龜紐。文曰某國公主之印。方五寸二分。厚一寸五分。印池用金。廣取容印。外篋用木。飾以渾金瀝粉盤鳳。中篋用金。鈿蟠鳳。內小篋飾如外篋。

親王世子。金冊金寶。承襲。止授金冊。傳用金寶。

世子妃亦用金冊。洪武二十三年。鑄世子妃印。制視王妃。金印龜紐。篆文曰某世子妃印。

郡王鍍金銀冊。鍍金銀印。冊文視世子。其妃止有鍍金銀冊。功臣鐵券。洪武二年。太祖欲封功臣。議爲鐵券。而未有定制。

或言。台州民錢允一。有家藏吳越王鏐。唐賜鐵券。遂遣使取之。因其式而損益焉。其制如瓦。第爲七等。公二等。一高尺。廣一尺六寸五分。一高九寸五分。廣一尺六寸。侯三等。一高九寸。廣一尺五寸五分。一高八寸五分。廣一尺五寸。一高八寸。廣一尺四寸五分。伯二等。一高七寸五分。廣一尺三寸五分。一高六寸五分。廣一尺二寸五分。外刻歷履恩數之詳。以記其功。中鐫免罪減祿之數。以防其過。字嵌以金。凡九十七副。各分左右。左頒功臣。右藏內府。有故則合之。以取信焉。三年。大封功臣。公六人。侯二十八人。竝賜鐵券。公李善長。徐達。李文忠。馮勝。鄧愈。常茂。侯湯和。唐勝。宗陸仲亨。周德興。華雲龍。顧時。耿炳文。陳德。郭子興。王志。鄭遇春。費聚。吳良。吳楨。趙庸。

廖永忠俞通源華高楊璟康鐸朱亮祖傅友德胡美韓政黃彬曹良臣梅思祖陸聚二十五年改製鐵券賜公傅友德侯王弼耿炳文郭英及故公徐達李文忠侯吳傑沐英凡八家永樂初靖難功臣亦有賜者。

符牌凡宣召親王必遣官齎金符以往親王之藩及鎮守巡撫諸官奏請符驗俱從兵部奏行尚寶司領之洪武二十六年定制凡公差以軍情重務及奉旨差遣給驛者兵部既給勘合即赴內府關領符驗給驛而去事竣則繳嘉靖三十七年定制南京鳳陽守備內外官并各處鎮守總兵巡撫及各守一方不受鎮守節制內外守備並領符驗奏事凡監鎗整飭兵備并一城一堡守備官不許關領符驗其制上織船馬

之狀起馬者用馬字號起船者水字號起雙馬者達字號起單馬者通字號起站船者信字號洪武四年始製用寶金牌凡軍機文書自都督府中書省長官而外不許擅奏有詔調軍中書省同都督府覆奏乃各出所藏金牌入請用寶又造軍中調發符牌用鐵長五寸濶半之上鈹二飛龍下鈹二麒麟首爲圓竅貫以紅絲條嘗遣官齎金牌信符詣西番以茶易馬其牌四十一上號藏內府下號降各番篆文曰皇帝聖旨左曰合當差發右曰不信者斬二十二年又頒西番金牌信符其後番官欵塞皆齎原降牌符而至永樂二年製信符金字紅牌給雲南諸蠻凡歷代改元則所頒外國信符金牌必更鑄新年號給之此符信之達於四裔者也其武臣懸帶

金牌。則洪武四年所造。濶二寸長一尺。上釵雙龍。下釵二伏虎。牌首尾爲圓竅。貫以紅絲條。指揮佩金牌。雙雲龍。雙虎符。千戶佩鍍金銀牌。獨雲龍。獨虎符。百戶素雲銀牌符。太祖親爲文。釵之曰。上天祐民。朕乃率撫。威加華夏。實憑虎臣。賜爾金符。永傳後嗣。天子祀郊廟。若視學。藉田。勲衛扈從。及公侯駙馬。五府都督。日直。錦衣衛當直。及都督。率諸衛千百戶。夜巡內皇城。金吾諸衛。各輪官隨朝巡綽。俱給金牌。有龍者虎者。麒麟者。獅者。雲者。以官爲差。其扈駕金字銀牌。則洪武六年所造。尋改爲守衛金牌。以銅爲之。塗以金。高一尺濶三寸。分字號。凡五。仁字號。上釵獨龍。蟠雲花。公侯伯都督佩之。義字號。釵伏虎。盤雲花。指揮佩之。禮字號。釵獬豸。蟠雲花。千戶

衛鎮撫佩之。智字號。釵獅子。蟠雲花。百戶所鎮撫佩之。信字號。釵蟠雲花。將軍佩之。牌下鑄守衛二篆字。背鑄凡守衛官軍。懸帶此牌等。二十四字。牌首竅貫青絲。鎮撫及將軍。隨駕直宿衛者佩之。下直則納之。凡夜巡官。於尚寶司領令牌。禁城各門。金吾等衛。指揮千戶。分領申字號牌。午門自一至四。長安左右門。東華門。自五至八。西華門。自九至十二。玄武門。自十三至十六。五城兵馬指揮。亦日領令牌。東西南北中城。分領木金火水土五字號。留守五衛巡城官。并金吾等衛守衛官。俱領銅符。留守衛指揮所。領承字及東西北字號牌。俱左半字。陽文左比。金吾等衛。端門承天門。東西北安門。指揮千戶所。領承字及東西北字號。俱右半字。陰文右比。銅符字

號。比對相同。方許巡行。內官內使之出。亦須守門官。比對銅符而後行。皇城九門守衛軍。與園子手。各領勇字號銅牌。錦衣校尉上直。及光祿寺吏典廚役。遇大祀俱佩雙魚銅牌。永樂六年。駕幸北京。扈從官俱帶牙牌。五府六部都察院大理寺錦衣衛。各鑄印信。通政司鴻臚寺。各鑄關防。謂之行在衙門印信關防。其後命內府印綬監收貯。嘉靖十八年。南巡禮部領出。以給扈從者焉。凡郊廟諸祭。陪祀供事官。及執事者。入壇俱領牙牌。洪武八年始也。圓花牌。陪祀官領之。長花牌。供事官領之。長素牌。執事人領之。又謂之祀牌。凡駕詣陵寢。扈從官俱於尚寶司領小牙牌。嘉靖九年。皇后行親蠶禮。文官四品以上。武官三品以上。命婦及使人。俱於尚寶司領牙

牌。有雲花園牌。鳥形長牌之異。凡文武朝參官。錦衣衛當駕官。亦領牙牌。以防奸偽。洪武十一年始也。其制以象牙爲之。刻官職於上。不佩則門者却之。私相借者論如律。牙牌字號。公侯伯以勲字。駙馬都尉以親字。文官以文字。武官以武字。教坊官以樂字。入內官以官字。正德十六年。禮科邢寰言。牙牌惟常朝職官得懸。比來權奸侵柄。傳旨陞官者。輒佩牙牌。宜清核以重名器。乃命文職不朝參者。毋得濫給牙牌。武官進御侍班。佩刀執金爐者。給與。嘉靖二十八年。內府供事匠作武職官。皆帶朝參牙牌。嘗奉旨革奪。旋復給之。給事中陳邦修以爲言。禮部覆奏。會典所載文武官。出入禁門帶牙牌。有執事供事朝參之別。執事供事者。皆屆期而領。如期而繳。

惟朝參牙牌得朝夕懸之。非徒爲關防之具。亦以示等威之辨也。虛銜帶俸供事執事者。不宜槩領。第出入禁闈。若一切革奪。何由譏察。尚寶司所貯舊牌數百。上有入內府字號。請以給之。至於衛所武官。掌印僉書侍衛之外。非屬朝參供役者。盡革奪之。其納粟填註。冒賜牙牌。及罷退閑住官。舊所關領不繳者。俱逮問報可。

百官印信。洪武初鑄印局。鑄中外諸司印信。正一品銀印三臺。方三寸四分。厚一寸。六部都察院。并在外各都司。俱正二品銀印二臺。方三寸二分。厚八分。其餘正二品從二品官。銀印二臺。方三寸一分。厚七分。惟衍聖公。以正二品。三臺銀印。則景泰三年賜也。順天應天二府。俱正三品銀印。方二寸九

分。厚六分五釐。其餘正三品從三品官。俱銅印。方二寸七分。厚六分。惟太僕光祿寺。并在外鹽運司。俱從三品銅印。方減一分。厚減五釐。正四品從四品。俱銅印。方二寸五分。厚五分。正五品從五品。俱銅印。方二寸四分。厚四分五釐。惟在外各州從五品。銅印。方減一分。厚減五釐。正六品從六品。俱銅印。方二寸二分。厚三分五釐。正七品從七品。銅印。方二寸一分。厚三分。正從八品。俱銅印。方二寸。厚二分五釐。正從九品。俱銅印。方一寸九分。厚二分二釐。未入流者。銅條記濶一寸三分。長二寸五分。厚二分一釐。以上俱直紐。九疊篆文。初雜職亦方印。至洪武十三年。始改條記。凡百官之印。惟文淵閣銀印直紐。方一寸七分。厚六分。玉箸篆文。誠重之也。武臣受重

寄者。征西鎮朔平蠻諸將軍。銀印虎紐。方三寸三分。厚九分。柳葉篆文。洪武中嘗用上公佩將軍印。後以公侯伯及都督充總兵官。名曰掛印將軍。有事征伐則命總兵佩印以往。旋師則上所佩印於朝。此外惟漕運總兵印同將軍。其在外鎮守總兵參將掛印。則洪熙元年始也。有文臣掛將軍印者。王驥以兵部尚書征湖貴苗。掛征蠻將軍印。王越以左都御史守大同。掛征西將軍印。其他文武大臣。有領勅而權重者。或給以銅關防直紐。廣一寸九分五釐。長二寸九分。厚三分。九疊篆文。雖宰相行邊。與部曹無異。惟正德時。張永征安化王。用金鑄。嘉靖中。顧鼎臣居守。用牙鏤關防。皆特賜也。初太祖重御史之職。分河南等十三道。每道鑄二印。文曰繩愆糾繆。

守院御史掌其一。其一藏內府。有事則受以出。復命則納之。洪武二十三年。都御史袁泰言。各道印篆相類。乃命改製某道監察御史。其奉差者。則曰巡按某處監察御史。銅印直紐。有眼。方一寸五分。厚三分。八疊篆文。成祖初幸北京。有一官署二三印者。夏原吉至。兼掌九卿印。諸曹竝於朝房取裁。其任重矣。

明初賜高麗金印。龜紐方三寸。文曰高麗國王之印。賜安南鍍金銀印。駝紐方三寸。文曰安南國王之印。賜占城鍍金銀印。駝紐方三寸。文曰占城國王之印。賜土蕃金印。駝紐方五寸。文曰白蘭王印。

洪武十五年。製使節。黃色三簷寶蓋。長二尺。黃紗袋籠之。又

製丹漆架一。以節置其上。使者受命。則載以行。使歸則持之。以復命。二十三年。詔考定使節之制。禮部奏漢光武時。以竹為節。柄長八尺。其毛三重。而黃公紹韻會註。漢節柄長三尺。毛三重。以旄牛為之。詔從三尺之制。宮室之制。吳元年。作新內正殿。曰奉天殿。後曰華蓋殿。又後曰謹身殿。皆翼以廊廡。奉天殿之前。曰奉天門。殿左曰文樓。右曰武樓。謹身殿之後。為宮。前曰乾清。後曰坤寧。六宮以次列。宮殿之外。周以皇城。城之門南曰午門。東曰東華。西曰西華。北曰玄武。時有言瑞州文石。可甃地者。太祖曰。敦崇儉朴。猶恐習於奢華。爾乃導予奢麗乎。言者慚而退。洪武八年。改建大內宮殿。十年。告成。闕門曰午門。翼以兩觀。中三門。東西

為左右掖門。午門內曰奉天門。門內奉天殿。嘗御以受朝賀者也。門左右為東西角門。奉天殿左右門。左曰中左。右曰中右。兩廡之間。左曰文樓。右曰武樓。奉天殿之後。曰華蓋殿。華蓋殿之後。曰謹身殿。殿後則乾清宮之正門也。奉天門外兩廡間有門。左曰左順。右曰右順。左順門外有殿曰文華。為東宮視事之所。右順門外有殿曰武英。為皇帝齋戒時所居。制度如舊。規模益宏。二十五年。改建大內金水橋。又建端門承天門樓各五間。及長安東西二門。永樂十五年。作西宮於北京。中為奉天殿。側為左右二殿。南為奉天門。左右為東西角門。其南為午門。又南為承天門。殿北有後殿涼殿煖殿。及仁壽景福仁和萬春永壽長春等宮。凡為屋千六百三十餘楹。

十八年建北京。凡宮殿門闕。規制悉如南京。壯麗過之。中朝曰奉天殿。通爲屋八千三百五十楹。殿左曰中左門。右曰中右門。丹墀東曰文樓。西曰武樓。南曰奉天門。常朝所御也。左曰東角門。右曰西角門。東廡曰左順門。西廡曰右順門。正南曰午門。中三門翼以兩觀。觀各有樓。左曰左掖門。右曰右掖門。午門左稍南曰闕左門。曰神廚門。內爲太廟。右稍南曰闕右門。曰社左門。內爲太社稷。又正南曰端門。東曰廟街門。卽太廟右門也。西曰社街門。卽太社稷壇南左門也。又正南曰承天門。又折而東曰長安左門。折而西曰長安右門。東後曰東安門。西後曰西安門。北後曰北安門。正南曰大明門。中爲馳道。東西長廊各千步。奉天殿之後曰華蓋殿。又後曰謹身

殿。謹身殿左曰後左門。右曰後右門。正北曰乾清門。內爲乾清宮。是曰正寢。後曰交泰殿。又後曰坤寧宮。爲中宮所居。東曰仁壽宮。西曰清寧宮。以奉太后。左順門之東曰文華殿。右順門之西曰武英殿。文華殿東南曰東華門。武英殿西南曰西華門。坤寧宮後曰坤寧門。門之後曰玄武門。其他宮殿名號繁多。不能盡列。所謂千門萬戶也。皇城內宮。城外凡十有二門。曰東上門。東上北門。東上南門。東中門。西上門。西上北門。西上南門。西中門。北上門。北上東門。北上西門。北中門。復於皇城東南建皇太孫宮。東安門外東南建十王街。宣宗留意文雅。建廣寒清暑二殿。及東西瓊島游觀所。至悉置經籍。正統六年重建三殿。嘉靖中於清寧宮後地建慈慶宮。於仁

壽宮故基。建慈寧宮。三十六年。三殿門樓災。帝以殿名奉天。非題扁所宜用。勅禮部議之。部臣會議。言皇祖肇造之初。名曰奉天者。昭揭以示虔爾。既以名。則是昊天監臨。儼然在上。臨御之際。坐以視朝。似未安也。今乃修復之始。宜更定以荅天庥。明年。重建奉天門。更名曰大朝門。四十一年。更名奉天殿曰皇極。華蓋殿曰中極。謹身殿曰建極。文樓曰文昭閣。武樓曰武成閣。左順門曰會極。右順門曰歸極。大朝門曰皇極。東角門曰弘政。西角門曰宣治。又改乾清宮右小閣名曰道心。旁左門曰仁蕩。右門曰義平。世宗初。墾西苑隙地爲田。建殿曰無逸。亭曰函風。又建亭曰省耕。曰省斂。每歲耕穫。帝輒臨觀。十三年。西苑河東亭榭成。親定名曰天鷲房。北曰飛靄。

亭。迎翠殿前曰浮香亭。寶月亭前曰秋輝亭。昭和殿前曰澄淵亭。後曰趨臺坡。臨漪亭前曰水雲榭。西苑門外二亭曰左臨海亭。右臨海亭。北開口曰湧玉亭。河之東曰聚景亭。改呂梁洪之亭曰呂梁。前曰機金亭。翠玉館前曰擷秀亭。

親王府制。洪武四年定。城高二丈九尺。正殿基高六尺九寸。正門前後殿。四門城樓。飾以青綠點金。廊房飾以青黛。四城正門以丹漆金塗銅釘。宮殿窠拱攢頂中畫蟠螭。飾以金邊。畫八吉祥花。前後殿座用紅漆金蟠螭。帳用紅銷金蟠螭。座後壁則畫蟠螭彩雲。後改爲龍。立山川社稷宗廟於王城內。七年定。親王所居殿。前曰承運。中曰園殿。後曰存心。四城門南曰端禮。北曰廣智。東曰體仁。西曰遵義。太祖曰使諸王觀。

名思義以藩屏帝室九年定親王宮殿門廡及城門樓皆覆以青色琉璃瓦又命中書省臣惟親王宮得飾朱紅大青綠其他居室止飾丹碧十二年諸王府告成其制中曰承運殿十一間後爲圍殿次曰存心殿各九間承運殿兩廡爲左右二殿自存心承運周廻兩廡至承運門爲屋百三十八間殿後爲前中後三宮各九間宮門兩廡等室九十九間王城外周垣四門堂庫等室在其間凡爲宮殿室屋八百間有奇弘治八年更定王府之制頗有所增損郡王府制天順四年定門樓廳廂廚庫米倉等共數十間而已

公主府第洪武五年禮部言唐宋公主視正一品府第竝用正一品制度今擬公主第廳堂九間十一架施花樣獸脊梁

棟斗拱簷角彩色繪飾惟不用金正門五間七架大門綠油銅環石礎牆軌鐫鑿玲瓏花樣從之

百官第宅明初禁官民房屋不許雕刻古帝后聖賢人物及日月龍鳳狻猊麒麟犀象之形凡官員任滿致仕與見任同其父祖有官身歿子孫許居父祖房舍洪武二十六年定制官員營造房屋不許歇山轉角重簷重栱及繪藻井惟樓居重簷不禁公侯前廳七間兩厦九架中堂七間九架後堂七間七架門三間五架用金漆及獸面錫環家廟三間五架覆以黑板瓦脊用花樣瓦獸梁棟斗拱簷角綵繪飾門窗枋柱金漆飾廊廡庖庫從屋不得過五間七架一品二品廳堂五間九架屋脊用瓦獸梁棟斗拱簷角青碧繪飾門三間五架

綠油獸面錫環。三品至五品。廳堂五間七架。屋脊用瓦獸。梁棟簷桷。青碧繪飾。門三間三架。黑油錫環。六品至九品。廳堂三間七架。梁棟飾以土黃。門一間三架。黑門鐵環。品官房舍。門窗戶牖。不得用丹漆。功臣宅舍之後。留空地十丈。左右皆五丈。不許那移。軍民居止。更不許於宅前後左右多占地。構亭館開池塘。以資遊眺。三十五年。申明禁制。一品三品。廳堂各七間。六品至九品。廳堂梁棟。祇用粉青飾之。庶民廬舍。洪武二十六年定制。不過三間五架。不許用斗拱飾彩色。三十五年。復申禁飭。不許造九五間。數房屋雖至一二十所。隨其物力。但不許過三間。正統十二年。令稍變通之。庶民房屋。架多而間少者。不在禁限。

器用之禁。洪武二十六年定。公侯一品。二品酒注酒盞金。餘用銀。三品至五品。酒注銀酒盞金。六品至九品。酒注酒盞銀。餘皆髹漆木器。不許用硃紅。及抹金描金。雕琢龍鳳文。庶民酒注錫。酒盞銀。餘用髹漆。百官牀面屏風。榻子。雜色漆飾。不許雕刻龍文。并金飾朱漆。軍官軍士。弓矢黑漆。弓袋箭囊。不許用朱漆描金裝飾。建文四年。申飭官民。不許僭用金酒爵。其椅卓木器。亦不許朱紅金飾。正德十六年定。一品二品。器皿不用玉。止許用金。商賈技藝家。器皿不許用銀。餘與庶民同。

明史彙

志第五十終

失之故可觀已。

科目者。沿唐宋之舊。而變其法。專取四子書。及易書詩春秋禮記五經。命題試士。蓋太祖與劉基所定。其文略仿宋經義。然代古人語氣。爲之體用排偶。謂之八股。通謂之制義。三年大比。以諸生試之直省。曰鄉試。中式者爲舉人。次年以舉人試之京師。曰會試。中式者。天子親策於廷。曰廷試。亦曰殿試。分一二三甲。以爲名第之次。一甲止三人。曰狀元榜眼探花。賜進士及第。二甲若干人。賜進士出身。三甲若干人。賜同進士出身。狀元榜眼探花之名。制所定也。而士大夫。又通以鄉試第一爲解元。會試第一爲會元。三三甲第一爲傳臚云。子午卯酉年鄉試。辰戌丑未年會試。鄉試以八月。會試以二月。

皆初九日爲第一場。試四書義三道。經義四道。洪武時定。四書主朱子集註。易主程傳。朱子本義。書主蔡氏傳及古註疏。詩主朱子集傳。春秋主三傳及胡安國張洽傳。禮記主古註疏。永樂間。頒四書五經大全。廢註疏不用。其後春秋亦不用。張洽傳。禮記止用陳灝集說。十二日爲第二場。試論一道。判五道。詔誥表內科一道。十五日爲第三場。試經史時務策五道。廷試以三月朔。鄉試直隸於京府。各省於布政司。會試於禮部。主考鄉會試俱二人。同考鄉試四人。會試八人。提調一人在內京府官。在外布政司官。會試禮部官監試二人。在內御史在外按察司官。會試御史供給。收掌試卷。彌封謄錄。對讀受卷。及巡綽監門。搜檢懷挾。俱有定員。各執其事。舉子則

國子生及府州縣學生員之學成者。儒士之未仕者。官之未入流者。皆由有司申舉。性資敦厚。文行可稱者。應之。其學校訓導。專教生徒。及罷閑官吏。倡優之家。與居父母喪者。俱不許入試。試卷之首。書三代姓名。及其籍貫年甲。所習本經。所司印記。試日入場。講問。代冒者有禁。晚未納卷。給燭三枝。文字中迴避御名廟號。及不許自序門第。彌封編號。作三合字。考試者用墨。謂之墨卷。謄錄者用硃。謂之硃卷。試士之所謂之貢院。諸生席舍。謂之號房。人一軍守。謂之號軍。試官入院。輒封鑰。內外門戶。在外提調監試等。謂之外簾官。在內主考同考。謂之內簾官。廷試用翰林及朝臣。文學之優者。為讀卷官。共閱對策。擬定名次。候臨軒。或如所擬。或有所更定。傳制

人不審恐有誤

唱第。狀元授修撰。榜眼探花授編修。二三甲考選庶吉士者。皆為翰林官。其他或授給事御史主事。中書行人。評事太常。國子博士。或授府推官知州知縣等官。舉人貢生不第。入監而選者。或授小京職。或授府佐。及州縣正官。或授教職。此明一代取士之大略也。終明之世。右文左武。然亦嘗設武科。以收之。可得而附列也。初太祖起事。首羅賢才。吳元年。設文武二科。取士之令。使有司勸諭民間秀士。及智勇之人。以時勉學。俟開舉之歲。充貢京師。三年詔曰。漢唐及宋。取士各有定制。然但貴文學。而不求德藝之全。前元待士甚優。而權豪勢要。每納奔競之人。夤緣阿附。輒竊仕祿。其懷材抱道者。恥與竝進。甘隱山林。而不出。風俗之弊。一至於此。自今年八月始。

特設科舉務取經明行修博通古今名實相稱者朕將親策於廷第其高下而任之以官使中外文臣皆由科舉而進非科舉者毋得與官於是京師行省各舉鄉試直隸百人河南山東西陝西北平福建江西浙江湖廣皆四十人廣西東皆二十五人才多或不及者不拘額數高麗安南占城詔許其國士子於本國鄉試貢赴京師明年會試命禮部尚書陶凱前翰林院學士潘庭堅為主考官取中俞友仁等一百二十名帝親製策問試於奉天殿擢吳伯宗第一午門外張掛黃榜奉天殿宣諭賜宴中書省授伯宗為吏部員外郎餘以次授官有差時以天下初定令各行省連試三年且以官多缺少舉人俱免會試赴京聽選又擢其年少俊異者張唯王輝

等為翰林院編修蕭韶為祕書監直長令入禁中文華堂肄業太子贊善大夫宋濂等為之師帝聽政之暇輒幸堂中評其文字優劣日給光祿酒饌每食皇太子親王迭為之主賜白金弓矢鞍馬及冬夏衣寵遇之甚厚既而謂所取多後生少年能以所學措諸行事者寡乃但令有司察舉賢才而罷科舉不用至十五年復設十七年定科舉之式命禮部頒行各省後遂以為永制而薦舉漸輕久且廢不用矣十八年廷試擢丁顯練子寧花綸為一甲授修撰編修進士之入翰林自此始也使進士觀政於諸司其在翰林承勅監等衙門者曰庶吉士進士之為庶吉士亦自此始也其在六部都察院通政司大理寺等衙門者仍稱進士觀政進士之名亦自此

始也。其後試額有增減。條例有變更。考官有內外輕重。闈事有是非得失。其細者勿論。其有關於國是者。不可無述也。鄉試之額。以漸而增。正統間。南北直隸。定以百名。江西六十五名。他省又自五而殺。至雲南二十名。為最少。嘉靖間。增至四十。而貴州亦二十名。慶曆啓禎間。兩直隸益增。至一百三十餘名。他省漸增。無出百名者。交趾初開。以十名為額。迨棄其地。乃止。會試之額。國初無定。少至三十二人。而其多者。洪武乙丑。永樂丙戌。至四百七十二人。其後或百名。或二百名。或二百五十名。或三百五十名。增損不一。至成化乙未。而後率取三百名。有因題請及恩詔。而廣五十名。或百名者。非恒制也。初制禮闈取士。不分南北。自洪武丁丑。考官劉三吾自信

蹈所取。宋琮等五十二人。皆南士。三月廷試。擢陳郊為第一。帝怒所取之偏。命侍讀張信等十二人覆閱。郊亦與焉。帝猶怒不已。悉誅信蹈及信郊等。戊三吾於邊。親自閱卷。取任伯安等六十一人。六月復廷試。以韓克忠為第一。皆北士也。然訖永樂間。未嘗分地而取。洪熙元年。仁宗命楊士奇等。定取士之額。南人十六。北人十四。宣德正統間。分為南北中卷。以百人為率。則南取五十五名。北取三十五名。中取十名。景泰初。詔書遵永樂間例。二年辛未。禮部方奉行。而給事中李侃爭之言。部臣欲專以文詞。多取南人。蓋取士之額。雖不可拘。而南北之分。則不可改。刑部侍郎羅綺亦助侃言。事下禮部覆奏。臣等奉詔書。非私請也。取士若不以文。考官將何所據。

北方中土人才所生。古大聖賢皆非南人。卽以今言。如靖遠伯王驥。左都御史王翱。王文皆永樂間。不分南北。所取進士。豈可預謂北無其人。景帝命遵詔書。不從侃議。未幾給事中徐廷章復請。依正統間例。甲戌會試。禮部奏請裁定。於是復從廷章言。分南北中卷。南卷應天。及蘇松諸府。浙江江西福建湖廣廣東。北卷順天。山東。西。河南。陝西。中卷四川。廣西。雲南。貴州。及鳳陽。廬州二府。滁。徐。和三州也。成化二十年。萬安當國。周洪謨爲禮部尚書。皆四川人。乃因布政使潘積之請。南北各減二名。以益於中。弘治二年。黎淳爲禮部尚書。論積之失。復從舊制。嗣後相沿不改。惟正德三年。給事中趙鐸承劉瑾指。請廣河南。陝西。山東。西。鄉試之額。乃增陝西爲百。河

南爲九十五。山東。西俱九十。而以會試分南北中卷爲不均。乃增四川額十名。并入南卷。其餘并入北卷。南北均取一百五十名。蓋瑾陝西人。而焦芳河南人。票旨相附和。各徇其私。瑾芳敗。卽復其舊。初制會試。及兩京主考。皆用翰林。而各省考官。先期於儒官儒士內。聘明經公正者爲之。故有不在朝列。累秉文衡者。景泰三年。令布按二司。同巡按御史。推舉見任教官。五十以下。三十以上。文學廉謹者。聘充考官。於是教官主試爲定例。而會試及兩京同考官。亦皆取教職。五年。從禮部尚書胡濙奏。會試同考官。後亦止用詞林部曹。而直省分考。有司徇私。聘取或非其人。監臨官。又往往侵奪其職掌。成化十五年。御史許進請。各省俱視兩京例。特命翰林主考。

帝諭禮部嚴飭私弊而不從其請。其後屢戒外簾官毋奪主考權。考官不當則舉主連坐。又令提學考定教官等第以備聘取。然相沿既久積習難移。弘治十四年掌國子監謝鐸言。考官皆御史方面所辟召。職分既卑聽其指使。以外簾官預定去取名爲防閑。實則關節而科舉之法壞矣。乞敕兩京大臣各舉部屬等官。素有文望者。每省差二員主考。庶幾前弊可革。時未能從。嘉靖七年用兵部侍郎張璠言。各省主試皆遣京官或進士。每省二人馳往直隸。五經房考各加科部官一員閱兩科。兩京房考復罷。科部勿遣。而各省主考亦不遣京官。至二十四年給事中胡叔廉鄭大同復論教職權輕之弊。請視兩京例以京官主考。竟不果從。至萬曆十一年詔定

科場事宜。部議復舉張璠之說。言彼時因主考與監臨官禮節小嫌。故行止二科而罷。今宜仍遣廷臣。由是浙江江西福建湖廣皆用編修檢討。他省用科部官。而同考亦多用甲科。教職僅取一二而已。蓋自嘉靖二十五年從給事中萬虞愷言。各省鄉試精聘教官。不足則聘外省推官知縣以益之。四十二年又從南京御史奏。兩京同考用京官進士。易詩書各二人。春秋禮記各一人。其餘乃參用教官。萬曆四年復議兩京同考。教官衰老者遣回北京。取足於觀政進士。候補甲科。南京於附近知縣推官取用。至是教官益絀。初制會試同考分十七房。詩五。易書各四。春秋禮記各二。嘉靖十一年禮部尚書夏言論科場三事。其一言會試同考官例用講讀十一

人給事中三人。部曹三人。今翰林止講讀十一人。當盡入場。方足供事。乞於部科再簡三四人。以補翰林不足之數。世宗命如所請。然偶一行之。輒如其舊。萬曆十一年。以易卷多。減書之一。以增於易。十四年。書卷復多。乃增翰林一人。以補書之缺。至四十四年。禮部侍郎何宗彥。覆科臣余懋孳奏。詩易各增一房。共爲二十房。翰林十二人。科部各四人。至明末不。變。庶吉士之選。自洪武乙丑。擇進士爲之。不專屬於翰林也。永樂二年。旣授一甲三人。曾棨。周述。周孟簡等官。復命於第二甲。擇文學優等。楊相等五十人。及善書者。湯流等十人。俱爲翰林院庶吉士。庶吉士遂專屬翰林矣。復命學士解縉等。選才資英敏者。就學文淵閣。縉等選修撰。棨編修。述孟簡庶

吉士。相等共二十八人。以應二十八宿之數。庶吉士周忱。自陳年少願學。帝喜而俞之。增忱爲二十九人。司禮監月給筆墨紙。光祿給朝暮饌。禮部月給膏燭鈔人三錠。工部擇近第宅居之。帝時至館召試。五日一休沐。必使內臣隨行。且給校尉騎從。是年所選。王英。王直。段民。周忱。陳敬宗。李時勉等。名傳後世者。不下十餘人。其後每科所選。多寡無定額。永樂十三年乙未。選六十二人。而宣德二年丁未。止邢恭一人。以其在翰林院。習四夷譯書久。他人俱不得與也。弘治四年。給事中涂旦。以累科不選。庶吉士請循祖制行之。大學士徐溥言。自永樂二年以來。或間科一選。或連科屢選。或數科不選。或合三科同選。初無定限。或內閣自選。或禮部選送。或會禮部

同選。或限年歲。或拘地方。或採譽望。或就廷試卷中查取。或別出題考試。亦無定制。自古帝王儲才館閣。以教養之。本朝所以儲養之者。自及第進士之外。止有庶吉士一途。而或選或否。且有才者未必皆選。所選者未必皆才。若更拘地方年歲。則是已成之才。又多棄而不用也。請自今以後。立爲定制。一次開科。一次選用。令新進士錄平日所作論策詩賦序記等文字。限十五篇以上。呈之禮部。送翰林考訂。少年有新作五篇。亦許投試。翰林院擇其詞藻文理可取者。按號行取。禮部以糊名試卷。偕閣臣出題。考試於東閣。試卷與所投之文相稱。卽收預選。每科所選不過二十人。每選所畱不過三五輩。將來成就。必有足賴者。孝宗從其請。命內閣同吏禮二部

考選。以爲常。自嘉靖癸未。至萬曆庚辰。中間有九科不選。神宗常命間科一選。禮部侍郎吳道南持不可。崇禎甲戌丁丑。復不選。餘悉遵例。其與選者。謂之館選。以翰詹官高資深者一人課之。謂之教習。三年學成優者。畱翰林爲編修檢討。次者出爲給事御史。謂之散館。與常調官待選者。體格殊異。成祖初年。內閣七人。非翰林者居其半。翰林纂修。亦諸色參用。自天順二年。李賢奏定纂修專選進士。由是非進士不入翰林。非翰林不入內閣。南北禮部尚書侍郎及吏部右侍郎。非翰林不任。而庶吉士始進之時。已羣目爲儲相通計。明一代宰輔一百七十餘人。由翰林者十九。蓋科舉視前代爲盛。翰林之盛。則前代所絕無也。輔臣子弟。國初少登第者。景泰七

年陳循王文以其子北闈下第力攻主考劉儼臺省譁然論其失帝勉徇二人意命其子一體會試而心薄之正德三年焦芳子黃中會試中式芳引嫌不讀卷而黃中居二甲之首芳意猶不慊至降調諸翰林以泄其忿六年楊廷和子慎廷試第一廷和時亦引嫌不讀卷慎以高才及第人無訾之者嘉靖二十三年廷試翟鑿子汝儉汝孝俱在試中世宗疑二人濫首甲抑第一爲第二以第三置三甲及拆卷而所擬第三者果汝孝也帝大疑之給事中王交王堯日因劾會試考官少詹事江汝璧及諸房考朋私通賄且追論順天鄉試考官秦鳴夏浦應麒阿附鑿罪乃下汝璧等鎮撫司獄獄具詔杖汝璧鳴夏應麒竝革職閑住而勒鑿父子爲民神宗初張

居正當國二年甲戌其子禮闈下第居正不悅遂不選庶吉士至五年其子嗣修遂以一甲第二人及第至八年其子懋修以一甲第一人及第而次輔呂調陽張四維申時行之子亦皆先後成進士御史魏允貞疏陳時弊言輔臣子不宜中式帝爲謫允貞十六年右庶子黃洪憲主順天試王錫爵子衡爲榜首禮部郎中高桂論劾舉人鄭國望等言李鴻股中用一囟字吳人以生女爲囟豈宜入文字中且自故相子一時竝進而大臣之子遂無見信於天下者今輔臣錫爵子衡素號多才青雲不難自致而人猶疑信相半宜一體覆試以明大臣之心跡錫爵怒甚具奏申辨語過激刑部主事饒伸復抗疏論之帝爲謫桂於外下伸獄削其官覆試所劾舉人

仍以衡第一。且無一人黜者。二十年會試。李鴻中式。鴻大學士申時行壻也。榜將發。房考給事中某持之。以爲宰相之壻不當中。主考官張位使十八房考公閱。皆言文字可取。而給事猶持不可。位怒曰。考試不憑文字。將何取衷。我請職其咎。鴻乃獲收。王衡旣被論。當錫爵在位。不復試禮闈。二十九年。乃以一甲第二人及第。自後輔臣當國。其子亦無登第者矣。科場弊竇旣多。議論頻數。自太祖重罪劉三吾等。永宣間。大抵帖服陳循。王文之齟。劉儼也。高穀持之。儼亦無恙。弘治十二年會試。大學士李東陽少詹事程敏政爲考官。給事中華泉劾敏政鬻題。與舉人唐寅徐泰。乃命東陽獨閱文字。給事中林廷玉復攻敏政可疑者六事。敏政謫官。寅泰皆斥。譴寅

江左才士。戊午南闈第一。論者多惜之。世宗頗尚峻急。嘉靖十六年。禮部尚書嚴嵩連摘應天廣東試錄語以激之。應天主考及廣東巡按御史俱逮問。二十二年。帝手批山東試錄譏訕。逮御史葉經。杖死闕下。布政以下皆遠謫。亦嵩所中傷也。四十年。應天主考中允無錫吳情。取同邑十三人被劾。與副考胡杰俱謫外。南畿翰林遂不得典應天試矣。萬曆四年。順天主考高汝愚。中張居正子嗣修懋修。及居正黨吏部侍郎王篆子之衡之鼎。居正旣死。御史丁此呂追論其弊。且言汝愚以舜亦以命禹爲試題。始以禪受阿居正。當國者惡此呂。謫逐於外。而議者多不直汝愚。三十八年會試。庶子湯賓尹爲同考官。與各房互換闈卷。共十八人。明年御史孫居相。

劾賓尹私韓敬。其互換皆以敬故。時吏部方考察。尚書孫丕揚。因賓尹敬於察典。敬頗有文名。衆亦惜敬。而以其宣黨。謂其宜斥也。四十二年會試。吳江沈同和第一。同里趙鳴陽第六。同和素不能文。文多出鳴陽手。事發覺。兩人竝謫戍。時人以爲斷么絕六。又以其年丙辰。謂羣龍無首云。天啓四年。山東江西湖廣福建考官。皆以策問譏刺。降諭切責。初命貶調。旣而褫革。江西主考丁乾學。至下獄擬罪。蓋觸魏忠賢怒也。先是二年辛酉。中允錢謙益典試。浙江舉人錢千秋七篇大結尾。分置一朝平步上青天七字榜。後爲人所訐。謙益自檢舉。千秋謫戍。未幾赦還。崇禎二年。會推閣臣。謙益以禮部侍郎與焉。而尚書溫體仁不與。體仁摘千秋事。出疏攻謙益。

謙益由此罷。遂終明世不復起。其他指摘科場事者。前後非一。往往北闈爲甚。他省次之。其賄買鑽營。懷挾倩代。割卷傳遞。頂名冒籍。弊端百出。不可窮究。而關節爲甚。事屬曖昧。或快恩讐報復。蓋亦有之。其他小小得失。無足道也。歷科事跡。稍異者。永樂初。兵革倉猝。元年癸未。始令各省鄉試。二年甲申。始令舉人會試。以事變不循。午未之舊。七年己丑會試。中陳燧等九十五人。成祖方北征。皇太子令送國子監進學。俟車駕回京。廷試。九年辛卯。始擢蕭時中第一。十六年戊戌。廷試李馬第一。特賜名騏。閩之長樂人。閩人相傳。卽十年壬辰狀元。馬鐸同母弟也。母有身而嫁於李。故初名馬。以示不忘父姓云。二十二年甲辰。內閣擬孫曰恭第一。邢寬第三。帝

以曰恭二字相合成文。則爲暴字。曰孫暴不如邢寬。易寬第一。曰恭第三。用朱書填榜以示異。洪熙元年。仁宗與楊士奇定南北分卷之法。於卷面各書南北字以爲識。後遂遵行。宣德五年庚戌。帝臨軒發策畢。退御武英殿。謂翰林儒臣曰。取士不尚虛文。有若劉蕡蘇軾輩。直言抗論。朕當顯庸之。乃賦策士歌。以示讀卷官。顧所擢第一人林震。亦無所表見也。洪武四年。賜諸進士宴於中書省。是年賜宴於中軍都督府。八年。賜宴於禮部。遂著爲令。是年癸丑。廷試第一人曹鼐。由江西泰和典史。會試中式。正統七年壬戌。刑部吏南昱。公陵驛丞鄭溫。亦皆中式。十年乙丑。會試廷試第一皆商輅。輅淳安人。宣宗末年乙卯。浙榜第一人。三試皆第一。士子艷稱爲三

元。明代惟輅一人而已。廷試讀卷。盡用甲科。而是年兵部尚書徐晞。戶部侍郎奈亨。乃吏員。天順元年丁丑。讀卷左都御史楊善。乃譯字生。時猶未甚拘流品也。迨後無雜流會試。及爲讀卷官者矣。七年癸未。試日場屋火。死者九十餘人。俱贈進士出身。改期八月會試。明年甲申三月。始廷試。時英宗已崩。憲宗以大喪未踰歲。御西角門策之。正德三年戊辰。太監劉瑾錄五十人姓名。以示主司。因廣五十名之額。十五年庚辰。武宗南巡。未及廷試。次年世宗卽位。五月御西角門策之。擢楊維聰第一。而張璠卽是榜進士也。六七年間。當國用事。權侂人主矣。八年己丑。帝親閱廷試卷。手批一甲羅洪先。楊名歐陽德。二甲唐順之。陳束。任瀚。六人對策。各加評獎。大學

士楊一清等。遂選順之束瀚。及胡經等。共二十人。為庶吉士。疏其名上請。命官教習。忽降諭云。吉士之選。祖宗舊制。誠善。邇來大臣徇私。選取市恩。立黨於國。無益。自今不必選。留唐順之等。一切除授。吏禮二部。及翰林院。會議以聞。尚書方獻夫等。遂阿旨。謂順之等不必留。并限翰林之額。侍讀侍講。修撰各三員。編修檢討各六員。著為令。蓋順之等出。張璠霍翰門。而心以大禮之議為非。不肖趨附。璠心惡之。璠又方欲中一清。故以立黨之說進。而故事由此廢。迨十一年壬辰。已罷館選。至九月復舉行之。十四年乙未。親製策問。手自批閱。擢韓應龍第一。降諭論一甲三人。及二甲第一名。次前後之由。禮部因以聖諭。列登科錄之首。而十二人對策。俱以次刊刻。

二十年辛丑。考選庶吉士。題文曰。原政詩曰。讀大明律。皆欽降也。四十四年乙丑。廷試。帝始不御殿。神宗時。御殿益稀矣。天啓二年壬戌。會試。命大學士何宗彥。朱國祚為主考。故事。閣臣典試。翰詹一人副之。時已推禮部尚書顧秉謙。特旨命國祚。國祚疏辭。帝曰。今歲朕首科。特用二輔臣。以光重典。卿不必辭。嗣後二輔臣典試。以為常。是年開宗科。朱慎荃成進士。從宗彥。國祚請。即授中書舍人。崇禎四年。朱統鈔成進士。初選庶吉士。吏部以統鈔宗室。不宜官。禁近。請改中書舍人。統鈔疏爭。命仍授庶吉士。七年甲戌。知貢舉禮部侍郎林鈺言。舉人顏茂猷。文兼五經。作二十三義。帝念其該洽。許送內簾。茂猷中副榜。特賜進士。以其名另為一行。刻於試錄第一。


積雪山人集卷五十一 選舉一
名之前。五經中式者。自此不絕矣。

武科。自吳元年定。洪武二十年。俞禮部請立武學。用武舉。武臣子弟。於各直省應試。天順八年。令天下文武官。舉通曉兵法。謀勇出眾者。各省撫按三司。直隸巡按御史。考試中式者。兵部同總兵官。於帥府試策略。教場試弓馬。答策二問。騎中四矢。步中二矢以上者。為中式。騎步所中半馬者。次之。成化十四年。從太監汪直請。設武科鄉會試。悉視文科例。弘治六年。定武舉六歲一行。先策略。後弓馬。策不中者。不許騎射。十七年。改定。三年一試。出榜賜宴。正德十四年。定初場試馬上箭。以三十五步為則。二場試步下箭。以八十步為則。三場試策一道。子午卯酉年鄉試。嘉靖初定制。各省應武舉者。巡按

御史。於十月考試。兩京武學。於兵部選取。俱送兵部。次年四月會試。翰林二員為考試官。給事中。部曹四員為同考試官。鄉會場期。俱於月之初九。十二。二十五。起送考驗。監試張榜。大率仿文闈。而減殺之。其後條罷。條復。又倣文闈。南北卷例。分邊方腹裏。每十名。邊六。腹四。以為常。萬曆三十八年。定會試之額。取中進士。以百名為率。其後有奉詔增三十名者。非常制也。穆神二宗時。議者嘗言。武科當以技勇為重。萬曆之末。科臣又請。特設將材武科。初場試馬步箭。及鎗刀劍戟拳搏擊刺等法。二場試營陣地雷火藥戰車等項。三場各就其兵法。天文地利所熟知者言之。報可而未行也。崇禎四年。武會試榜發。論者大譁。帝命中允。方逢年。倪元璐。再試。取翁英等

375
2

百二十人逢年元璐以時方需才奏請殿試傳臚悉如文例
乃賜王來聘等及第出身有差武舉殿試自此始也十四年
諭各部臣特開奇謀異勇科詔下無應者



明史藁

志第五十一終

